



耳溪集 十六

墓誌銘  
墓表  
謚狀

共二十二

~ 16  
2330  
16



和  
號 2330  
卷 21-76

耳溪集卷三十四目

墓誌銘

巡撫使宋公墓誌銘

承旨陽山金公墓誌銘

泗川縣監贈兵曹判書鄭公墓誌銘

花岡鄭公墓誌銘

秋潭金公墓誌銘

省菴朴公墓誌銘

忍窩柳公墓誌銘

楓巖柳公墓誌銘



滄洲權公墓誌銘

萬妙居士權公墓誌銘

耳溪集卷三十四

墓誌銘

巡撫使宋公墓誌銘

并序

我東有國以來節義莫烈於莊陵六臣然乙丙之際時極艱禍極僭人無敢言其事者至二百年始伸以故當時志士或有托疾遜跡以自靖者而後世無傳焉余於野人之記見巡撫宋公事心獨奇其節悲其志而惜未得其詳有興陽士人宋基一千里踵余門賫遺事具禮幣再拜而請曰某宋巡撫之裔孫也先祖所樹立如是卓偉而始阨於時諱中逸於兵火



久未表顯於世若得公一言以資幽堂庶幾有徵於後顧余非立言者何足當是役而竊嘗慕公之義乃敢不辭而敘之公諱侃其先礪山人以高麗贈樞密院使惟翊爲上祖三世諱松禮當元宗時誅權臣林惟茂復政于王有大勲勞封礪良府院君曾祖曰嵩繕工令祖曰仁忠中郎將考曰良珍當革代不官有三男公其長也公事 世宗 文宗逮 端宗朝秩至嘉善大夫景泰乙亥受 王命巡撫南方旣畢事將還聞國家內禪疾馳向寧越反命于清泠浦辭出哭失聲守者愕然欲收之有一老吏私謂曰君當謹

所守而已奈何擠人於禍守者乃止公於是徑歸礪山杜門絕世事及聞 魯陵上賓走入窮山衣袞哭極哀遂不知所之家人跡之四方得見於興陽馬輪村山亭下興去王京千里絕海窮處也公匿名姓混跡農樵間盡三年制居常縱酒大醉狂走街路或登山臨野放聲大哭人人莫不環視笑之目之爲狂翁如是者十餘年家人旣從公因居山亭之西自號曰西齋獨携兩弟終焉土人至今稱其洞爲西齋洞公自卜葬地於樂安郡南薇院上戒子孫曰我死埋於是從遺命面午而封焉噫公之事蹟可見者止斯而

已生卒年月亦不傳况其嘉言懿行乎悲夫賈生有言曰廉恥不立苟若而可主上有敗則因而挺之矣有患則吾苟免而已立而觀之耳有便吾身者則欺賣而利之耳蓋憤世之辭也當公之時立乎本朝受厚恩據高官者何限而一朝遭危難視君父如路人委而不顧或翻身易貌立功賭寵占富貴自如其爲身謀也誠工矣聞公之風能不覲然乎余觀公與六臣皆專心所事之死弗貳其跡殊其義同如殷之三仁或死或去而孔子並稱其仁也然六臣以死顯公以隱晦獨無所褒揚又可慨已後之秉筆者撰國史

公可與六臣同傳也公有五男曰孟儒仲儒季儒伯儒叔儒五男各有一男曰思安思平思權思元思文其後益繁昌散居湖左居興陽者最盛至累百家往往以仕聞六世有弘淵奉使赴皇朝立軍功有大立宣廟丁酉用忠武公李舜臣薦授倡義別將討倭賊於尖山力戰死之贈叅議旌其里大立子諶 仁廟丁丑以洪原縣監擊北歸胡死於陣亦贈官旌閭其世篤忠義蓋有所自云遂爲之銘曰  
何地不可棲兮必宅于西何山不可埋兮必歸于薇  
公志如是我銘止此

承旨陽山金公墓誌銘 并序

國初有名臣曰金公佑生領中樞府事竹軒公云寶第三子佐命功臣德生之弟也公字文叔少受業於圃隱鄭先生慕紫陽之學故自號陽山云公為人魁梧嚴重少有俊才甫識字能開口驚人竹軒公嘗置膝上指火爐命製卽對曰誰將河濱陶身爲火德王竹軒大賞之知其爲遠器辛禡十四年戊辰我太祖受命攻遼公以白衣慷慨詣軍門上書極言小大逆順之義太祖旋師旣開國五年特授順天府使蓋思前日之言順乎天理也公居府以清白聞秩滿

民願留一年旣去伐石頌之 太宗卽位公兄佐命公從 上獵有猛虎犯蹕急佐命公從傍射殪之忌公者以危言持之竟置死公謝病歸羅州壬午丁竹軒憂自麗季來國俗多用佛事治喪公痛革之一循朱子禮鄉人多化之手輯家禮衍義補訓蒙要語以教後生與鄭公萃成公三問交善講道義 世宗乙卯以司諫徵 端宗甲戌以承旨徵皆不起 世祖丙子六臣遭禍丁丑 上王薨于寧越公時年八十六入深山痛哭以是年十一月十五日北向四拜遂仰藥絕葬于所居陽山洞公好學守正以名義自律

直隸集 卷三十四  
值國家不幸竟與三相六臣先後死噫死生亦大矣  
得其死之爲難如公者身旣退矣年已耄矣杜門以  
終餘齒於義固無害耳謂生可耻以死爲安君子以  
爲難焉公每論當世人物如黃翼成權陽村二公猶  
病其出處遇圃隱忌日必齋沐爲位哭終身不廢其  
平日所養可知而亦可謂不負所學矣有文集佚於  
兵燹事蹟無聞焉後孫都事觀欽掇拾遺事來乞銘  
良浩嘗誌興陽宋巡撫之墓竊竒其節比之六臣今  
見公樹立視宋公尤烈惜哉無人乎表章也余雖非  
立言者敢不銘銘曰

三相之死時也六臣之死義也公之死志也時也義  
也志也未知孰難而孰易其猶殷之三仁殊塗而一  
致乎

泗川縣監贈兵曹判書鄭公墓誌銘 并序

壬辰之難八路瓦解而惟晉州嬰城固守泗川縣監  
鄭公陳城外力戰而死賊不得逞明年復大膊義兵  
諸將投水死至今稱壬辰忠節推晉陽爲首而晉陽  
之殉國公實倡之公諱得說字君錫其先河東人府  
院君麟趾以元勲官上相子崇祖判度支封河南君  
寔公高祖也祖諱仁國護軍考諱希永僉樞妣全州



李氏公生於嘉靖乙丑狀貌異常鬚有三角額左有黑大痣勇力絕倫萬曆中有倭釁公遂投筆事弓馬戊子登武科壬辰以才勇選授泗川縣監未幾倭渡海陷釜山蹂東萊列鎮烏獸竄公慷慨奮身抽兵三百餘赴兵營時年二十八善騎射每戰輒居前賊披靡尋聞賊犯本縣引兵還與晉州判官金時敏合擊固城鎮海諸屯賊賊撤而遁頃之賊攻晉州時敏閉城拒守公聞警馳赴城外虛無人公撤民屋爲柵以自固兵使柳崇仁自昌原兵敗奔還倚公爲重已而賊大至崇仁軍潰公躍馬大呼收散卒手一鐵搥左

右擊會日暮雨下如注賊悉兵圍數匝公援弓射殺數十百人矢盡肉搏力竭遂死之卽壬辰十月六日也當時晉之城守旣固而公在城外血戰致死故賊之銳鋒已挫遂不得轉擣湖南公之死實有助於全城之功說者謂江淮之全實賴巡遠之力云者以此也亂定贈訓練院正旌其閭復其家公常騎白馬臨戰禁士卒無爭首級惟突陳馳射賊相戒曰謹避白馬將軍公有奴名曰白從入亂屍中以髯與痣驗公體夜負而逃至家啓視渾身血殷無完肌葬于扶餘東陵山先塋之次配姜氏翰林宗慶之女醉竹公克

真溪集 卷三十四  
誠之孫也干戈中治喪無違禮有一子澤雷甫八歲  
教以義方魁進士當光海廢 母妃時在太學抗章  
扶大倫謫死南海朝廷褒贈持平又旌其孝四孫千  
世晚世繼世壽世千世十一歲死於孝公之玄孫最  
烈以良浩備官太史來請誌墓之辭謹序而銘之銘  
曰  
其馬白其痣黑其髯三角似壯繆血流磧其屍赤英  
英毅魄並蠹石子死謫鳴太學忠烈續輝竹帛

花岡鄭公墓誌銘

并序

光海旣嗣位忌永昌君幽殺之又將廢 母妃舊相

鰲城府院君李恒福獻議極言倫常之重竄北塞完  
平府院君李元翼上書切諫賊臣李爾瞻主凶論其  
黨鄭造尹詔李偉卿等議其罪將置極律太學生鄭  
公澤雷憤然揮涕曰彝倫斃矣國將亡矣 先王養  
士四十年政爲今日遂抗章言 大妃不可廢元翼  
不可罪造詔等可斬疏入光海大怒流之南海縣  
仁廟反正奉 大妃復位悉誅諸賊臣凡言事竄斥  
者皆召還擢用而公已歿不及見哀哉命贈公司憲  
府持平遣官賜祭士林合享於扶餘義烈祠公之死  
於是爲榮而無遺恨矣公字休吉河東府院君麟趾

之六世孫壬辰死節臣泗川縣監得說之子也母晉州姜氏翰林宗慶之女也公幼而秀朗八歲父死於難姜淑人教兼父師稍長文辭穎發風儀端粹名動士林年二十七舉進士第一名癸丑凶論起公以布衣遊京師與族兄復亨進士李穰伏闕請誅奸凶乙卯禍益急約鄉儒洪茂績草疏將會于軍器寺茂績先拜疏公曰草野之疏不如館學之重遂入太學倡率蔡裕後高傳川李以省等三十餘人即日抗章爾瞻必欲致之死遂竄絕島姜淑人往從之地蒸熱多毒霧淑人病革公號天泣斫指進血得小愈居歲餘

竟不起公毀幾絕喪歸不得隨益哀毀餽粥罕入口兩日失明肌削骨立歿于謫廬是己未六月二十日也得年纔三十五妻鄭扶櫬歸葬于扶餘東陵山癸坐之岡五年邦運鼎新彝倫重敘士論於是大振人以公之氣節比古之董養陳東稱以花岡先生而不名鄭氏東萊大姓贈承旨思敬之女公亡終身啜粥衣麻頭髮少長輒斷去之國人稱其烈 肅廟時復其戶有四子長曰千世甫十一歲奉櫬渡海收拾公詩文並割壁上手筆以來日夜號泣不離柩側不食一旬而天次日晚世十九魁進士以落題下詩字降

置第三名娶杞平君俞伯曾女早卒無后次日繼世壽世進士壽世有三子曰河一河九河千公南遷時有詩曰誰知南竄路猶抱北望心又曰天連西極星猶北地盡南溟水自東聞者莫不悲之公之友太學士張維撰其碑豐山洪良浩追誌其墓曰

國之榮朽士爲元氣氣之衰壯惟士是視邦運中厄倫彝將圯尺疏噴血擎天拄地身死絕海名高百世遺祠屹然大江長逝

秋潭金公墓誌銘

并序

新羅之季王子興光知國將亂遜于光山之野麗祖

革命卽其地賜食邑子孫因貫焉爲東方甲族與麗相終始連十世爲平章事人稱其居爲平章洞入我朝有曰崇祖以文章鳴世官止司諫子曰紀二十登科選入弘文典翰甫踰三十而卒士流惜之是爲公會祖也祖諱景愚工曹佐郎贈司僕寺正有二子長諱大成以孝贈承旨次諱大振亦贈左承旨有六子公其第二也承伯父後公諱友伋字士益以萬曆甲戌生幼而端秀善事父母從林錦湖亨秀學文識夙詣甫弱冠遭丁酉亂護親入關東有避亂士女數千號泣嶺下不敢進公問其故聞天將扼嶺上游騎攔

道劫掠公卽仗劍詣軍前抗言于天將曰將軍奉皇  
命救屬國奈何不戢士卒而害生民天將聞之大驚  
卽斬數人懸首轅門道路遂無梗於是公名聞遠邇  
亂定登上庠光海時赴舉至漢京時賊臣爾瞻用事  
館學儒發廢 母論將投疏受公名公大書紙背曰  
生於母者忍爲此耶凶徒大嫉之削儒籍及對策居  
魁拔其名自是不復應舉癸亥 仁廟光御館儒交  
章薦之除 穆陵叅奉暫拜命歸鄉又除不復就專  
心爲己之學當丙子亂遣子翰林汝鉦奔問于南漢  
以詩誡之曰昔爲吾父子今作爾君臣恩義兼難盡

臨危莫愛身其忠義之所蘊如此晚年學益精業益  
進士友翕然尊之從學者甚衆自號秋潭居士兄弟  
六人湛樂唱酬待宗族訓子弟一循於義軌方公應  
舉在京也夫人聞時有凶論千里馳書曰無倫之世  
不可暫留其平日刑家之化又如此癸未三月五日  
考終于第葬于長城府南珠丘山道內多士合辭脩  
享于慕巖徐節孝書院配瑞山柳氏將仕郎景進之  
女林錦湖之外孫女也後以長子貴贈兵曹叅判夫  
人贈貞夫人葬與公同原舉三男三女男長汝鉦文  
科兵曹叅判次汝錦汝鏞皆通德郎女歸林瑞金重

五李翀汝鈺二男四女男再光一光女歸高斗紀徐文起奇挺翼尹拭汝錦二男一女男重光世光女歸柳值汝鏞三男鼎光啓光弘光曾玄多不盡記公之耳孫尚烈千里繭足來乞志塋之辭余旣慕公義又感其誠遂按狀而銘之曰

空拳而抗三軍之帥勇也一言而扶萬世之倫義也之勇之義配道於氣官豈我榮學以求志移孝爲忠貽厥良嗣廟食南土式此多士

省菴朴公墓誌銘

并序

公諱弼傳字景賚東國之朴冠冕於士族代有名德

有若潘南先生尚衷以闢異教斥權臣顯於麗朝有若冷川先生紹以正學直言齊名己卯士流暨于穆陵錦溪君東亮爲中興名臣錦溪之子漪以文學賜暇湖堂實生南溪先生諱世采傑然爲宗儒從祀文廟是爲公大父也考諱泰輿水運判官妣漆原尹氏掌令遇丁之女以丁卯五月朔生公骨相異凡氣質明秀南溪先生撫頂喜曰此兒必克家七歲已通孝經小學九歲先生之訃至自坡州之溪上公獨在京第設位哭薦紳章甫來哭者傾一世而公受吊應對無異成人觀者皆稱先生有後十六歲居父憂持

喪如禮取讀性理諸書恍然有悟勵志求道至忘寢食明齋先生貽書期勉曰南溪文獻之傳其在斯矣自是屢以書牘往復質問明翁亟稱之壬寅朝廷交薦公學行擬侍講院諮議旋除翊衛司洗馬公以年少布衣直拜宮官國朝所未有辭不就癸卯又拜內侍教官公勉膺以避名乙巳中生員試遭尹淑人喪服除拜副率陞衛率移工曹佐郎出爲開寧縣監庚戌棄歸鄉廬讀書講禮乙卯筵臣盛言公造詣之高召以司憲府持平選經筵官丁巳又以掌令召皆不至冬除丹陽郡守公謂旌招之禮不敢當也牧民之

官行吾志耳遂往赴焉以化峽俗作人才爲先務日延諸生誨以事親敬長之道冠婚喪祭之禮儒化大行是年 上將追復 慎妃遣禮官問議公對以是乃 列朝所未遑者實有光於繼述之孝庚申五月又問 孝廟加上號當否公附奏曰 肅廟癸亥有追上 太祖徽號之議臣祖文純公某與其時建言之先正意不合臣有所受今日之事亦無異不敢出位而論尋解紱歸西山遠近學者多從之遊辛酉除執義下別諭敦召公陳疏辭壬戌又除執義尋遷侍講院進善及 莊獻世子入學詣城外待禮成投疏

歸是年四月致祭于南溪先生公暫入城陪祭而歸  
留疏待罪九月又辭宮銜請取覽文純公小學讀書  
記時書筵方講小學也癸亥三月辭憲職 上賜批  
曰元良冠日近此時輔導爲先務爾其幡然上來公  
詣城外俟禮成徑歸因自劾時定 中殿謁廟禮問  
拜位拜數對曰 大殿廟謁拜位旣在階下 中殿  
宜無異同拜禮古無男子婦人之別而朱子言男子  
再拜婦人四拜謂之夾拜今日遵行恐不出此五月  
除太僕正甲子又承憲召聞 上候違豫到城外陳  
清心保齋之道兼陳教導 世子之方 優批嘉納

是冬除仁川府使陞辭 上引見命 東宮侍坐討  
論經旨旣蒞官值乙丙荐饑疏陳拯米之貽弊舊逋  
之擾民 上皆從之民無流瘠丁卯解歸已巳 世  
子代理首拜執義下別諭曰余受 聖上付托之命  
攝軍國機務之重所以惜分陰新學業比前當加千  
百而薰陶成就專責於讀書之士其卽上來出入講  
筵公上書辭附陳五條曰敦孝道奮大志立紀綱明  
大義辨賢邪 世子賜批嘉獎 大朝遣禮官問  
毅宗皇帝追配大報壇之禮公獻議曰近來搢紳章  
甫之間置大義於相忘臣於上書 東宮畧陳此義



今若得見 皇壇並配之舉則臣雖疾病垂死亦將  
鼓舞增氣拜南陽府使辭遞庚午二月用大臣言特  
陞通政階除兵曹叅知擬成均祭酒出爲襄陽府使  
以新資未及疏辭不赴旋除掌隸院判決事上書乞  
收新命 溫批不許辛未至月 永陵王妃上陟儒  
臣論 東朝服制有以未繼體爲言者以問公對曰  
帝王家雖以繼體爲重服制則當以天倫爲正壬申  
六月病革入京第以二十二日易簀公稟性溫粹儀  
度端凝表裏泐然如水清玉潔冲年已能觀感於家  
庭旣成童奮然志于學常謂敬者入道之根柢爲學

之樞紐治心之密律已之嚴不待勉強自中節度家  
居每早起盥櫛謁家廟退必靜坐終日夜分始解巾  
襪迅雷雖寢必興焚香危坐性喜恬素冠履弊甚處  
之怡如家人飢寒未嘗經意屢典州郡歸輒仰官糶  
及期先輸鄉人往往化之初南溪先生當士論乖張  
之時身任調劑一無偏係其立言定論將爲後來之  
公案晚年悉取平生著述手自掄選點以青紅或無  
點而別之蓋其慮後也深歲月浸遠而時象漸變士  
趣日移有竊取先生之書增刪其句節變幻其指意  
以求媚於當時者公乃抱遺書隱于山中曰豈可使

吾祖之書爲時輩所亂耶及英廟再命刊行也始從先生門下士李公世煥而議曰有點無點俱出先生之手到今後生何敢妄取捨以招羣疑耶乃告先生之廟盡取青紅與無點之草而並入梓焉於是先生之隻字片言無遺漏矣時又有私編先生年譜家狀者而大違本旨公聞之驚往見沙川金公榦而痛言之輒唯唯而書猶如舊公乃棄不用先生再從孫文敬公弼周慨然曰先生秉心繩直衡平本無錙銖之偏非但吾門之所宗仰將百世與共豈可以一己私低仰耶遂撰定墓表闡揚大公至正之道而引重

於李文成公向非公身任繼述力排羣議先生之志事幾乎不明矣粵自癸甲以來黨論日痼先生有憂之疏陳蕩蕩平平之道蓋取不偏不倚之中而英廟所以曠世興感者也先生歿後柄國用而主時論者截取蕩平字作爲圈套成一色曰公每咄咄語人曰吾祖蕩平之論卽爲世道消朋黨而今於色目之外又添一目此豈吾祖本意也哉平日持論終始如一故不偶於世而多屈於外斯可驗識見之精操守之確矣先生之學地負海涵而尤邃於禮公承其緒而致其工嘗演先生禮說手書成帙而節文尤備經

曲之微疑變之節瞭然如指掌焉嗚呼南溪先生範世之學牖後之功光明燁燁而門人後生分裂掩晦不合不公賴公發明本旨不墜於地可傳於後豈惟無愧於家學可謂有光於斯文矣公不喜著述有若干詩文並禮說藏于家學者稱省菴先生是年九月葬于長湍松西面庚坐之原淑夫人德水李氏奉事賢錫女有婦德先公二十六年卒無育取伯氏經歷公第三子師烈而子之繼室星山李氏考光普貞一敬慎善事夫子不以衣食累公人稱刑家之化後公二十年卒亦不育師烈三男祖源曾源喆源進士縣

監二女適洪景聖柳聖淵祖源男宗益女趙沆鎮妻曾源男宗禹女曹錫老妻喆源男宗石宗右女呂東根妻良浩後生也未嘗請教於門屏望見公德容而今縣監君賫家狀來屬誌壙之辭竊喜溪翁之學復明於世而後學自此可述矣謹敘次而系以銘曰  
有斐南溪道贊皇極獨立昭曠弘濟世溺門分俗淪徇名混真公彰先志力抗羣嗔抱書深山片言拱壁居敬守約蹈繩挈尺旌招翩翩葆我素履辭內居外薄言其試禮有致曲辨疑合經先祖是似永示後程

忍窩柳公墓誌銘

并序

楓巖柳士輝嘗以其先大父忍窩公遺事托良浩狀之會良浩叅修國史未暇屬筆而楓巖遽歿良浩走位哭既葬其孤肅之持衰造余門曰三世之藏皆未有銘今將誌諸坎是銘急於狀也請先銘余拜而復曰狀貴詳銘貴確蓋銘難於狀也然余辱先君子之托惟負幽明是愧是懼敢辭其難乎乃讀公遺事公生有至性自孩提時未嘗須臾去親側先公嘗邁癘革公齧指灌血疾良已及丁憂廬於墓躬爨以奠啜粥不釋衰晨夕上塚雖甚風劇雨不廢一日攀擗哭不覺夜黑忽有猛虎當前公歎曰子侍親墓誠不足

感物耶虎卽負公去至四十里乃捨旣明家人跡而得焉人皆異之養母夫人家甚窶食飲衣服必適必時喪又守墓前後凡六年弗懈每遇諱日悲哀如始喪必一月澡身食素以致齋或病未躬事輒席藁廟前淚徹於地與伯氏共一室饑飽寒煖與均日相對愉怡六十年如一日伯氏歿公亦老矣獨處舊堂往往嗚咽歔歔傍人不忍聞焉嘗手輯先代事行名曰追慕錄以寓孝思此乃公事親奉先之懿也公才藻夙就八歲從塾師學作詩能驚人族叔父全昌尉廷亮見而大器之甫成童通四書二經嘗以小學自律

中歲棄舉業杜門守靜惟沈舍人濡李翰林萬謙與之交善梁教官處濟閔翊衛以升皆從公論禮此又公才學交遊之槩也公諱灃字聖游貫於全州以寶文閣直提學克恕爲上祖有大司諫軒吏曹叅判世麟以名蹟顯副率永忠以文行著世稱萍湖先生卽公會祖也祖諱怡四山監役贈太僕正考諱廷稷贈左承旨妣潘南朴氏慤之女公生於崇禎戊寅卒於明陵甲申葬于平山府藥山坐卯之岡公前後娶元配楊州趙氏大司成存世孫先公歿同塋而異封後配李氏慶州望族洗馬廷齡曾孫有婦德享大年以

禮別葬用中子壽恩贈公嘉善大夫戶曹叅判夫人俱贈貞夫人趙一男長春李二男園春載春園春以大耄秩至同中樞長春男光德女歸李碩復郭必昌同樞三男長日光翼卽士輝以經行薦官翊衛次光迪季光弼生進兩試載春男光澤光涑女婿李允復翊衛初娶無子子光迪子肅之今進士女南錫老妻三娶生二男碩之穆之一女未行光迪一男承大宗復以穆之爲後光弼男勗之此卽公氏系生卒子姓也嗚呼人之百行惟孝爲大公旣得其大者餘可推又可畧也銘曰

孝子上山猛獸不噬孝子入土螻蛄不嘬孝子之樹  
斧斤弗覘孝子之銘風雨不沫

楓巖柳公墓誌銘

并序

漢城之南有小丘戴石特秀左右楓林翳然有屋數  
楹茆編而土級者故處士柳公講學之廬也公諱光  
翼字士輝幼而志學十歲能誦二經未冠博通書史  
善功令已而棄不屑遂專意窮格之學補心經註解  
著四七互發之書士友翕然重之執費而從者甚衆  
於是建書齋立講議每月朔望設席行禮指授問難  
登降揖讓秩如也公時年三十矣學者稱恒齋先生

平居整衣冠危坐動止不失繩尺沉潛性理仰思俯  
讀於大學研蹟最深而尚有未融徹者一日恍然悟  
曰得之矣遂撰大學輯釋多所發明可見爲學之有  
本矣嘗患易學之泥於占筮作觀易三編憂學者之  
躡於高遠著講學提要又以東人貴耳賤曰文獻疎  
缺乃輯東史編年景賢新編公性强記異學曲藝稗  
乘僻族靡不淹貫爲詩文典贍明暢不費雕飾平生  
論述凡百有餘弓可謂才優而業廣矣公家素貧躬  
炊以養親中年就食海西手畔鋤與田夫雜於溝塍  
而傭力輒倍人歸則讀書不輟地主異之爲構書堂

遣諸生就學焉先是政曹聞公名欲官之方伯又以  
經行聞屢擬初仕庚辰夏始授 昌陵叅奉以親意  
就職例陞 宗廟副奉事 英宗大王有事于 太  
室曰公曰彼郎豈飭躬者耶舉止端矣及啓 諸室  
公進伏曰 某位神席加一於他室違圖式 上驚  
問之親奉櫝以卷出左右相顧動色尋遷尙瑞院直  
長詣政院安金寶有一承旨燕服偃于傍公呵院吏  
曰 御寶在前承旨當公服跪何臥不起也一院皆  
斂容月滿陞繕工監主簿甲申移西部都事時有酒  
禁部民有犯者坐配延安未幾相臣奏放翼歲敘拜

造紙別提移義禁府都事丙戌押重囚赴耽羅以未  
兼程投稷山居數月得釋丁亥敘復禮賓寺主簿除  
高山縣監陞辭以奏對誤遞是時今 上在東宮勵  
志學問日開書筵僚屬皆峻選西銓舉公授翊衛嘗  
講資治綱目至朱鮪事講官曰光武匿私怨加爵土  
帝王之度殆符於封雍齒矣公曰雍齒窘辱帝而已  
若鮪則害伯升者也不加戮足矣何功而封之耶至  
明帝事公曰自起撞郎失在外其過輕褊察發隱病  
在內其過重也 東宮皆是之常稱博學桂坊戊子  
移司僕主簿是冬出監知禮縣賑饑蠲徭修廨課學

士民胥悅壬辰棄歸稷山丙申遭父喪哀麻餐粥不以老殺見者感焉既闋復還楓巖舊居庚子十二月十九日終享年六十八明年二月從先兆葬于衿川落星洞面申之岡柳氏出全州寶文閣直提學克恕始顯於麗季逮我朝清宦聞人相望也贈承旨廷稷卽公會祖也祖諱澧號忍窩以孝贈叅判考諱囿春以高年官同知中樞事妣贈貞夫人密陽朴氏叅判簪之玄孫也公承太宗後爲從祖伯父諱萬春之嗣妣曰清州韓氏良浩嘗誌忍窩墓詳其世德此不復載余於少時獲見公於樗村沈先生之門已知其篤

志勵行及晚節屢造楓巖之廬左琴右書蕭然有衡門之樂公亦以時來訪討論微奧得聞所未聞相與之深忘年與形也公旣歿而余亦老矣每念疇昔之好愀然傷懷今公子肅之持公狀托誌塋之辭顧余膚淺何能發揮公所蘊以詔後人謹次事行之著於外者以歸之悲夫公凡三娶清州之慶坡平之尹皆無男取仲弟光迪之子卽肅之升進士後配丹陽禹氏桓圭女生二男碩之生員穆之女二南錫老妻尹出也南履僖妻禹出也肅之博而文能述父業銘曰學不由師求諸博得之在我成於獨耕也爲養夜則



讀祿不求至試則薄當言不慄行吾直廚無宿爨書  
盈屋青楓之社行者式落星之原魂兮托

滄洲權公墓誌銘

并序

大嶺之東有賢而隱者曰灘翁傳魯門之學灘翁之  
姪孫曰滄洲處士以灘翁爲師學者尊之是何權氏  
之多賢也滄洲諱揆字一之安東人也權氏起於麗  
初太師幸佐太祖得姓爲巨宗逮我朝左議政軫相  
兩朝子曰吏曹佐郎七臨有孫縣監琛當 端宗遜  
位與直提學元昊遜原州節義名世其後間以蔭進  
八傳而至諱維行誼著稱諱德讓仁厚有長者風卽

公祖若考也妣南陽洪氏察訪遇箕女以 肅廟丙  
戌二月十五日生公聰慧出凡四歲在懷中畫指作  
字父母奇之甫踰十歲就學山堂十四遭父喪能執  
禮十九遊學漢京當世俊士樂與之交從祖灘村先  
生師事魯城養志林泉公從之學受讀小學程朱書  
日左右薰染傳寫禮書端謹敏恪同學者莫及焉先  
生稱曰吾家有此祥麟瑞鳳及先生歿公撰次言行  
請墓文於后溪趙公裕壽趙公大賞曰某之述君本  
末如君之形容魯門云庚戌母夫人歿方革嘗糞斫  
指旣葬廬墓側深山無人烟虎豹交跡而不設柴援

處之不懼人服其誠孝地主朴公弼琦躬往訊慰爲之感歎鄉人列公行誼屢呈方伯繡衣公益自謙挹趙相國顯命對人言西峰嫡傳不爲不多而嶺以東則故監役權某而已再傳又有從孫某斯文一脉寄於海上寧不奇哉因舉擬於將作及寢郎時公年未及強仕也公以過情爲恥黽勉赴舉丙子升上庠嘗因事入泮宮見羣居諧謔舉止不莊退而喟曰國家養士之意豈亶然哉遂去而屏跡築室于臨江松竹間玩繹經典以自娛每遇佳山水短筇獨往徜徉嘯咏飄然有出塵之想丙戌六月十九日終葬于高城

漢陽洞遠近聞者相與吊曰斯文衰矣閭巷愚夫婦或爲之出涕公天姿近道自少奮發力學服事灘翁潛心性理晚尤用功於易禮及朱子書手謄口誦殆忘寢食常以持敬爲本積久養深純粹靜一閉戶端坐淡然自守事親承順無違處兄弟怡如也叔父年高窮約所居稍遠而每日省候竭力奉養推及於宗族隣比急人甚已曲有恩義鄉黨化之凡有所爲必曰滄洲以爲何如一菴尹公東源嘗推以嶺外高士灘翁子德訓有文行與公同業稱其高邁之識純篤之操卓然不可及先輩長德之言同堂有識之論皆

非苟爲阿好者是可以見公也歟乙卯移厝于七松北負壬之原公初娶豐壤趙氏學生時奭女事尊姑以誠事夫子以禮安貧好義親黨無間言生先公五年歿先公十年窆于七松西內之洞舉一男曰啓萬進士再娶坡平尹氏學生師泰女啓萬三男燦炫煥二女適崔浩養李鍾新良浩與公未嘗一接德容而竊聞東海之上有讀書砥行之士公其人也今進士君遣其子跋涉重嶺具狀致書曰樛村先生嘗銘吾灘翁矣公樛村之甥也銘吾父其可乎余義不敢辭遂敘其狀而系以詩曰

東海之上翠然而高者金剛之山金剛之下冷然而清者七松之灘隱居者其誰大小二權祖奮孫承魯門之傳志高而行潔學粹而歸全生於是藏於是旣安且堅

萬妙居士權公墓誌銘

并序

余年弱冠遊於士友見一弁而髦者頽然而秀瞻顧儼如成人余異而問焉卽安東權聖一也遂與許交旣冠造余論文治詞賦蠡涌颺發十五中禮部試譽聞蔚然及余策命于朝聖一獨迤邐不利晚登上舍未老歸鄉廬徜徉山水間以終其友小瀛居士洪聖

幾爲楚語而哀之又發揚其志行告于所嘗與遊者其長子燭持其狀來示余曰吾父少日之契惟丈人在願有以壽墓石嗚呼余何忍辭公諱萬衡大司諫諱益淳之小子也自高麗太師幸以功受姓食采于安東遂爲望族暨本朝有校理節值莊陵遜于越佯狂不仕世稱栗亭先生高祖曰鑊光海時守正斥外仁廟起之官承旨及丁丑行成退而老于鄉曾祖曰堦由史館入經幄至小宗伯祖曰贈吏判斗璿取伯氏贈吏議斗相季子爲後是爲公考後配貞夫人李氏潤德女實生公幼而器宇宏偉有度量見者

期以遠大公亦自負好讀書尤喜心經近思錄儒家書長老欲使從師問學公獨曰士能立志檢身是學也何必繩尺而近名耶其孝友根於天十一歲遭父喪母夫人哀悴不自持公左右扶將十年不離側旣失恃毀瘠爲終身崇急人卹窮如嗜欲常書壁曰待有餘始濟人其濟何時當疹疹大行多蓄藥物以救人危鄉鄰稱之爲佛自以世祿之裔常惓惓於國家及壬午哀痛如不欲生口蔬腰布語輒於邑已而盡室下鄉公少也爲文辭敏贍而不畔於軌三十三始升司馬遂不樂應舉遍遊名山屢入四郡楓嶽最愛

王溪集 卷三十四  
萬瀑妙香之奇自號萬妙居士彈碁賦詩以自老竟未表見於世嗟乎惜哉公生於丁未二月二日歿於癸丑二月三十日葬于楊州平丘馬山里之西岡娶完山李匡明女叅判大成曾孫舉四男長燿進士前佐郎出爲從兄一衡後次焄文科別檢次燁進士次燠燠一子馥進士焄一子秘燁二子爵一未名燠二子皆幼噫余與公結髮相遇共筆硯見其胸懷疎宕內無一點伎克外無一毫矯飾粹然士君子也其後聚散契濶殆四五十年每相對握手吐情愫猶是昔日聖一而把酒欣然不見有落拓不偶之色其曠達

之度老而不化豈古所稱得全于天者歟聖幾之狀曰白髮赤子心純然一塊善十言者可謂知心之交傳神之筆也余復何加焉遂三復而咏嘆系之以辭曰

坦乎其中豐乎其外志何長於濟物才何窒於用世  
鶴立江臯雲逗水逝魚鳥兮爲賓碁樽兮爲儷庭有  
桂兮階有蘭揚芬兮振彩石老兮松茂天報善兮未  
艾

耳溪集卷三十四 終

耳溪集卷三十五目

墓表

判中樞府事具公墓表

左司諫牟公墓表

仁川府使金公墓表

大興郡守鄭公墓表

結城縣監鄭公墓表

承文院副正字韓公墓表

溪陰趙公墓表

清江李公墓表

竹陰李公墓表

桐江處士李公墓表

閒雲居士尹公墓表

鶴洞李公墓表

太學生金君墓表

李君昌之墓表

景心齋洪公墓表

贈左叅贊姜公墓表

誠菴韓處士墓表

耳溪集卷三十五

墓表

判中樞府事具公墓表

公諱允鉦字聖集具氏世籍于綾城高祖諱文濟成  
 川府使贈吏曹叅議曾祖諱宗柱贈吏曹判書祖諱  
 燾漢城判官贈左贊成考諱宅奎漢城判尹贈左贊  
 成妣南陽洪氏司饗僉正禹采女以 肅廟庚子十  
 二月一日生公 英廟癸酉中謁聖乙科己卯擢通  
 政嘉善二階庚寅陞資憲乙未轉崇政丙申轉崇祿  
 己亥進輔國初隸承文院爲正字終提舉本院濟用

監主簿終提舉本監入講院爲文學司書兵曹則爲  
佐郎正郎叅判判書吏曹爲佐郎正郎戶曹工曹並  
爲叅判判書禮曹刑曹並爲判書漢城府爲左尹判  
尹司憲府持平司諫院再爲大司諫承政院始爲假  
注書及陞同副承旨至都承旨議政府左叅贊敦寧  
府知事判事申樞府知事判事義禁府同知事知事  
判事提舉內醫院瓦署惠民造紙署內資內贍寺於  
外則間嘗以便養爲谷山府使京畿都事觀察湖西  
關西奉命則都事于湖西而檢田貳賀正使而赴燕  
伴送北使於灣上旣年七十入耆社此公之官歷也

掌邦賦則節冗費以裕經用主兵柄則疏淹滯以勸  
鞅韋按西藩則滌逋簿以安邊氓此公之宦績也公  
始居宮僚受知 莊獻世子爲不悅者所中傷賴  
英廟知公無罪辨釋之又知公謹密遂獎用公而置  
喉院內局者最久及 上寢疾久未豫羣不逞將不  
利於 東宮時國榮爲宮官以保護爲名頗倚公爲  
重及 當宁丁酉逆變層起國榮摠禁旅宿衛闕中  
而命公長直藥院監視御膳故與國榮共周旋者三  
年國榮恃恩驕恣浸失人臣禮尋結逆臣德相有異  
圖於儲嗣公心懷憂憤乘間涕泣言宜廣嬪御以迓



景命 上爲之動容及國榮敗臺臣有言公與國榮  
厚者 上爲靖浮議薄竄公以庚子三月謫靈光甫  
數旬特宥之因諭諸大臣以事顛末廷臣始知公有  
深念遠猶之言不敢復議公蓋公之交國榮以此而  
上之知公亦以此故恩眷終始無替復入本兵倚任  
如舊此公之 三朝際遇也以壬子閏四月二十七  
日卒壽七十三貞敬夫人安東金氏權知承文院副  
正字禹甲女有賢德親黨懷其仁與公同年生公先  
葬長湍府松西面石好洞壬坐原夫人後公五年丙  
辰五月二十七日卒祔焉壽七十七男廩文科判書

膺蔭仕牧使出後公弟僉正君側室男廩武科判官  
女夫李滄主簿申大檢判書一子弘元早夭以再從  
兄子哲魯爲後牧使無子取僉正君次子康之子陽  
元爲子廩有子誠元良浩弱冠時已與公同遊於翰  
墨之林公神宇秀聳氣岸豪邁與人交善談論篤於  
故舊不以榮悴或貳恤窮濟急如不及有古人風焉  
及其立朝也一心事國不顧利害故人多慕媚屢阨  
于阨而受知 聖主昭晰而全安之位極公孤壽登  
耆社有子繩武同躋金緋福履之盛當世罕比詩云  
夙夜匪解以事一人此公所以結 主知也書曰其

王澤集 卷三十五  
心休休其如有容焉此公所以受多福也不佞與公策名登朝相先後四十年閱歷事變進退未嘗皆同而情好久而不渝每相對懽然道舊故擬於晚節謝事相携於山阿水曲佚蕩棊樽品題花竹以娛餘齒矣及余告老就閒而公不待追念疇昔不覺愴焉疚懷今判書君述公事行來徵樹墓之記嗚呼余雖老廢筆研於公其何忍辭遂綴其大畧以畢少日之舊契云

左司諫牟公墓表

牟氏本中國弘農人宋高宗時大將軍慶與尚書楊

應誠奉命使高麗求往五國城通問二帝高麗畏金謝不奉詔楊公不受表而去公則留本國冀致誠感動不墜君命而事竟不遂乃尚仁宗公主封咸平君子孫仍家焉其後有諱震老官至典書生諱汝長官大阿飡生諱皓官平章事生諱時靈官典書卽公四世也公諱恂字恂之弱冠中司馬遊庠泮負笈于圃隱鄭先生之門從遊之士未嘗或之先也 太宗十七年丁酉登文科自門下注書遷校勘 世宗朝陞左司諫尚風節不肯俛仰隨時退居于鄉當 魯陵遜位守正不撓放逐于嶺南之三嘉縣憂憤而卒葬

于本縣掛鍾山公少有至性嘗以親疾問藥于醫家  
時江漲不得渡公呼天而哭忽洪流自斷世稱截江  
先生所居里有古井邑人傳為孝子并有古礎傳為  
忠臣宅載邑誌有一男楹生二男曰方良方善方良  
生蘭方善生亨蘭六世孫世茂世蕃 肅宗朝俱登  
文科世茂官察訪世蕃官縣監亨九世孫景觀 英  
宗庚午登文科官濟州判官景觀子達兼 當宁已  
西文科今為景陽察訪牟氏自中國來海東以名宦  
成家司諫公以忠孝名世子姓蕃昌冠纓不絕為湖  
南著姓斯可書也而 莊陵諸臣為時所諱闕而不

彰今 聖上表章遺忠設壇賜祭同時潔身守節之  
士靡不褒揚而公獨不與識者慨焉察訪君編公世  
德千里謁余求所以表阡者余慕公之義感君之誠  
於是乎書

仁川府使金公墓表

吾妹婿金季長吉士也早登宦籍壯年殞折吾妹悞  
然含卹育子女成嫁娶年六十七以甲寅二月朔日  
歿孤子思采扶襯合葬於交河之野塘里壬坐之原  
來屬表阡之辭嗚呼余幼失怙恃兄弟五人艱難成  
立而中歲失吾仲弟視季長猶弟哭之如割半體吾

耳溪集 卷三十五  
妹少余四歲白首相依今又捨我而去老而獨存百  
哀填臆何忍把筆而爲之辭又何忍終默而已乎季  
長諱亨大月城大姓新羅敬順王之後鷄林君稠佐  
我 太祖策功開國遂爲奕世冠冕之族有直提學  
千齡以文章節行名世有慶林府院君命元贊 宣  
祖中興平大難官左議政諡忠翼勲庸德業爲世偉  
人有孫曰南重官禮曹判書爲時名卿諡貞孝卽公  
高祖也曾祖諱一振成均生員贈領議政祖諱柱臣  
寔誕 仁元王后官領敦寧府事封慶恩府院君諡  
孝簡考諱後衍刑曹叅議贈吏曹判書妣貞夫人海

平尹氏府使沆之女始孝簡公伯氏進士諱聖臣有  
子諱象衍以學生早卒宗祀中絕判書公命公承其  
後學生公配曰青松沈氏弘文館應教諱濡之女也  
公生于 英宗庚戌九月十四日沈夫人穉而鞠之  
夫人生長法家有女士之德自其孩笑時已導以義  
方公天姿溫秀步履不出規度稍長士友樂與之交  
壬申以國舅孫除 懿陵叅奉移拜翊衛司副率甲  
戌以尊號都監勞陞六品授典牲署主簿公以年少  
不樂蔭仕辭遞銓曹輒收復之丙子丁丑歷司僕寺  
漢城府司宰監諸寺主簿爲司僕者三掌樂司宰翊

衛者再掌隸司評者一戊寅以軍資監判官除宜寧縣監庚辰陞榮川郡守甲申移延安府使未赴乙酉又移仁川府使是年十二月二日一疾不起得年董三十六噫嘻短哉配卽我先考贈左贊成諱鎮輔之第二女舉一男思采一女歸生員徐有教側出男思季女適沈訥之徐之男憲輔公爲人端介祥和事沈夫人作嬰兒戲事兄判書公如嚴父叔母韓孺人寡而無嗣奉之如母誠敬備至出宰外邑輒輿而往盡忠養焉少就學於外氏及其傾敗愍念救卹盡其心力人以爲難又篤於故舊窮交多仰而爲歸嘗曰世

間好事無如急人之困其居官也約已裕民三典郡邑歸無餘裝往歲庚辰余尹月城公在榮川爲拜敬順王廟馳來三百餘里仍迎致妹氏團歡旬月余又往省安東先墓轉至榮川訪龜鶴亭水石棲雲寺古碑因見其治民馭吏惠而有法至於剔蠹湔弊曲中肌理雖老於爲郡者有不逮焉余爲之瞠然自失嗟乎天不假年旣不能致身清朝以顯其名乃棲棲數邑又未能展其才志寧不惜哉吾妹氏承宗祀以誠撫婢僕有恩每遇父母諱日精備數簋以助致不洎之慕及其晚年家道益落而黽勉有無獨持門戶撫

養庶出皆成室家尺帛斗粟推而施人未嘗見慳窘之色寬厚疏通有士君子之風宜其膺受遐福而竟無徵焉嗚呼豈命也歟老淚漬墨言不能文使人知吉士哲媛之藏而已

大興郡守鄭公墓表

公諱養淳姓鄭氏東萊人也初字聖功後避徽號以晦叔行東萊之鄭起於高麗逮我朝代有名相稱東方甲族曾祖東平尉載崙以領議政太和之子出後於仲父左議政致和爲 寧陵賢都尉祖曰孝先蚤卒無嗣子從父弟子錫五是爲左議政貞簡公貞敬

夫人彥陽金氏叅判致龍女也公以 肅宗壬辰生乙丑蔭補敦寧府叅奉陞司饗院奉事戊辰貞簡公歿旣吉調廣興倉副奉事以冊禮敦匠勞陞六品踐諸府署郎除開寧縣監不赴癸酉拜 東宮翊衛甲戌出監軍威縣翌歲大饑公悉心調哺治溝洫通水利荒野大闢流亡咸集及歸民紀以石庚辰丁母夫人喪壬午調司憲府監察移司饗僉正癸未守大興郡甲申解歸乙酉八月二十八日卒配青松沈氏領議政壽賢女後公一年生先公七年逝合葬于廣州省達面枕良之原從先兆也舉三男東蓋郡守東協

郡守東喆直長女婿曹善振側室男謹也蓋娶判書趙雲達女五男泰容晉容謙容觀容履容協娶大司諫尹尙任女二男魯容漢容喆娶判官趙鴻達女無育取履容子之嗚呼公之配卽我姨母也良浩及見公少時豐幹頤容儀觀偉然言語恂恂惟恐傷人焉敦恪周慎有大家規度貞簡公甚倚之然賓客無識面者恭抑樸素人不知爲宰相子也居官斤斤奉法不踰繩尺 英廟常召見目之曰醇謹有乃父風堪大用矣夫人生於法家孝友出天事舅姑小心畏栗數十年如初來時躬暨公克勤克敬親黨咸期以遐

福而年位俱不長人皆惜之今三子並錄于朝能率家訓爲善之報其在後歟

結城縣監鄭公墓表

公諱思峻字謹初新羅初慶州有六部大人第四部長曰智伯虎賜姓鄭氏是爲肇祖也高麗政堂文學珍厚直提學宗輔門下侍中玄英卽其顯祖也五世祖諱知年成均司藝贈左贊成高祖諱孝終事我成廟官禮曹叅議冊佐理功臣曾祖諱甲先宣畧將軍祖諱彙有隱德大提學蘇世讓題其墓曰樂易君子考諱承復 中廟朝登武科選宣傳官 明宗乙

卯倭奴擾邊起復從戎有戰功官至咸興判官退休于家號玉溪居士初娶竹山安氏郡守秀嶽之女生二男次日思翊受業於金公鸞祥之門潛心性理建景賢堂於寒暄先生居謫遺墟與諸生講道不幸短命再配延安金氏府使燁之女有三男公其長也以嘉靖癸丑生公於順天府姿質超凡文辭夙成萬曆庚辰丁父憂三年居廬一遵禮制旣長膂力過人兼習弓馬有文武全才常以殉國立功自期 宣廟甲申登武科選入宣傳官庚寅丁母憂守廬壬辰倭大舉入寇以朝命起復時李忠武舜臣爲本道左水使

聞公才畧辟致幕府光陽縣錢灘卽賊路要衝也選公爲伏兵將往備之遠斥堠設奇策與倭七戰大破賊艦賊不敢近李公馳啓褒聞時龍灣行朝饋餉四阻公慷慨揮泣傾盡家資募聚義粟千石遣其弟思竑姪憤間關水路達于義州 宣廟嘉之拜禮賓寺主簿尋除宣傳官是時我國火炮之制始出而勝字雙穴等銃體短口淺其猛不如倭製李忠武每欲效鑄而人無解者獨公究得其妙率匠監鑄與倭銃無異李公大奇之以新造五柄封上朝廷請令諸道倣此而鑄因請監造臣論賞丁酉倭再窺天兵無見糧



朝廷特命公爲募粟官公盡力措辦轉漕不絕已亥  
拜結城縣監秩滿歸家以積勞兵間病發三月二十  
六日卒于家葬于府北石隅山負申之原配南陽洪  
氏承旨潛之女葬祔公一男宣武科訓練副正壬辰  
扈 駕龍灣無子以從氏察訪恂之子之搏爲嗣有  
三男時亨仁亨大亨女適府使任益夏權益亨盧亨  
載孫聃齡錫齡聯登武科昌齡進士長房出也昌齡  
繼次房龜齡鳳齡庶男喬齡季房出也公以故家之  
裔兩世起復於兵亂爲國效忠而公於壬丁七載之  
間竭誠盡節公弟與姪亦奮義從軍克紹乃祖玉溪  
之志可謂世篤忠貞矣凡爲其後孫者曷不勉勉而  
承承乎謹述其世德表其墓石以永其傳持狀而來  
請者七代孫致煥也

承文院副正字韓公墓表

不佞於甲戌歲掌試如湖南選增廣初試大科取二  
十人而得人最盛韓公東攝以對策居高等及漢城  
會圍中第者五人而韓公亦與焉湖左文科之一榜  
五人蓋前所未有而皆南中之望也旣放榜公來見  
余待之以恩門余扣其所存學博而詞富矐乎其不  
可及也爲言自少治功令屢占解額僅得小科而終

未大成有麻衣者言某年遇知音始可得之今果驗  
殆有前定者云余歎其不偶翌歲病不起余爲之愕  
然痛惜馳書問其孤公有六男而未及長成後數十  
年公之孫百祚齋行錄來京師請以一言表公卅余  
愴然而敘之公初諱東愈字起八高麗太師蘭之後  
也入我朝有慶州府尹理卽柳巷脩之弟也兵曹叅  
判清城君終孫爲公十代祖也至府使晰始居南原  
曾祖生員諱徹吾明性理之學號爲備齋祖生員諱  
致相號隱灘傳家庭之訓德行著聞考諱箕範娶道  
康金遂初之女以 肅廟戊寅生公八歲遭父喪金

氏教如嚴師德器早成文章瞻蔚鄉黨稱以雋才公  
性度寬和居家孝友接人和易襟懷灑落不設畦畛  
家素窶寒而窮交貧族至誠救濟人無賢不肖皆得  
其歡心至於文藝之業士林視以模楷三十一遭戊  
申亂慷慨奮身曰吾以勲舊之裔世受 列朝培養  
之恩當此板蕩之辰豈可袖手在家也卽馳入校中  
發檄諭遠近鄉人願赴者六七十人區畫方畧將舉  
義勤王會凶徒就誅事乃止丁卯中司馬試甲戌登  
文科入堂后乙亥五月四日卒于京邸歸葬于隱灘  
公墓右後移同府驛村西坐之原公配羅州羅氏致

耳溪集 卷三十五  
和之女生於乙亥終於辛未葬於隱灘公墓下舉六男曰思仁思文思中思天思晦庶子思一孫十二人宗祚思仁出邦祚達祚元祚顯祚頤祚思文出膺祚萬祚思中出正祚思天出百祚益祚八祚思晦出嗚呼盛哉公之績學種德宜乎大受而纔占一第壽止中身人不能無憾於司命而終焉子孫振振菀然如鄧林之枝淇園之竹天之報公於是單厚矣凡爲公之後者曷不趾其美繼其家聲凡爲公之鄉人者曷不視公爲法勉於自修耶立石于墓將以慰公靈而勸後人也

溪陰趙公墓表

湖南趙奎運文行士也以其高祖溪陰公有忠孝大節持多士狀辭請褒於朝屢上言不報末乃汪然出涕曰吾先祖之名行而不能表顯於世吾父吾兄嘗有志而未就至於不肖之身遊京師數十年終不克有成是吾罪也願得當世立言之家有以不朽吾祖則庶可以歸拜先墓矣遂賣桐岡李公毅敬所爲狀來屬於余余與趙君有同門之誼感其誠而不敢辭謹按公諱彭年字景老其先漢陽人六世祖叅奉孝生始南徙于羅州數世又徙康津祖安植叅奉考世

傑贈叅議妣金海金氏殷恭之女公以嘉靖己酉生  
聰慧絕倫讀書一過輒背文嘗觀里胥檢田文案後  
偶燒其券公卽誦傳不錯人皆驚異稍長學於慎監  
司喜男文藝瞻蔚弱冠魁課試癸酉中生員丙子登  
文科差會寧府教授以遠違親辭不赴補校書正字  
陞著作博士間兼奉常叅奉癸未奔父喪甲申又遭  
母憂公素有至行侍病晝夜不離忽有野鷄自入厨  
以供親方革割指灌血及荐喪廬於墓側晨夕上哭  
雖甚風雨不廢丙戌服畢授成均典籍南學教授遷  
司憲府監察冬除全義縣監邑小歲荒損已裕民庚

寅拜承文校檢壬辰倭警急公上疏言都城是 廟  
社所在宜繕守禦之備効死勿去且請出內帑布帛  
賜南征將士四月以大祝詣 靖陵夜聞 大駕西  
狩僕執鞚泣請歸湖南以避兵公叱曰 君父播越  
于外乃不奔問忍草間苟活保妻子乎遂與典籍徐  
希信還渡江向揚州大灘時賊鋒已逼京城道路梗  
晨夜間關追及於平壤李公恒福請獎之 上召見  
特授禮曹正郎已而 車駕向義州公病甚追躡復  
授校檢時將乞援於皇朝大提學尹公根壽製奏文  
以示公公摘論數句尹公大悟曰君雖有詞翰名不

耳溪集 卷三十五  
料其如此真湖堂才也尋遷刑曹正郎時寵姬之弟  
金公諒恃恩驕縱杖殺商人臺官執奏公諒諉其奴  
欲代囚公憤之抗言於判書鄭崑壽曰方今國步板  
蕩命令不行亟置公諒於法然後人心可服而亦可  
爲恢復之機矣鄭公吐舌曰君不畏死耶旋差都監  
郎運芻糧於薛天使事皆辦戶曹判書李誠中稱之  
曰文士多疎於事務夫人幹局何如是也癸巳正月  
天兵破走平壤賊東宮奉 廟社主住寧邊 上命  
選大祝官馳告捷冢宰李公元翼舉公以遣 大駕  
還次永柔公仍以刑官從疏陳三事曰備邊司論功

不平也都元帥金命元當遞也平安兵使李潤德當  
戮也時議皆目以狂妄領相尹公斗壽嘆曰今諸臣  
聚寄一隅厭厭不能出氣惟志全軀命取官爵而已  
此人獨能言人所不敢言可謂鳳鳴朝陽矣大司憲  
沈喜壽言于 上曰臣爲風憲之長反有愧於刑郎  
矣 上數幸肅川平壤禮接天將公每攝通禮官進  
退有儀酬答無滯 上喜曰予嘗謂具成善於此任  
今彭年無遜矣當此時華使絡屬迎接禮繁上國人  
意少不愜輕加折辱雖有位望者或至捽曳於庭公  
應對周旋動合機宜邢軍門玠謂柳公成龍曰東國

宜不競也如趙某者尙滯下僚乎李提督之駐師京城也往呈國咨請尾擊奔倭劉員外之留鎮定州也承命往候嘗監統制使李舜臣軍於南海往諭體察使韓應寅軍於臨津皆出特簡而能宣布德意一軍無不感奮公雖屈於郎曹乎遭時艱危慷慨自誓常思立奇功報國恩而時人視以文士不嫻武畧遇知明主而終未能大試識者恨之亂少定以病解官因思南歸求爲錦城提督官甲午還鄉戊戌起爲礪山郡守公到官曰新經大創雖主拊摩蘇息兵難之後民不知法亦宜董之以威遂痛繩土豪數三族竟以

劾去自是閉戶不出取讀洛閩諸書尤喜易啓蒙窮其蘊奧築室於北溪之上種花栽竹以自老學者多從之請業稱溪陰先生甲辰錄扈聖原從功一等戊申 宣廟上賓公不御酒肉廢內寢盡三年及光海嗣位有除不一起後人服其高識壬子正月二十四日終 仁廟登極贈承政院左承旨配淑夫人原州李氏縣監元麟之女與公合葬于感化山枕子之岡有子三人冬昕叅奉冬暘主薄冬曦別檢公起自遐遠力學成名文辭足以華國誠孝至於感物固可謂豪傑之士而至若叱馭勤王負羈綫犯干戈不顧萬

死之危奔走兵間忠義奮發尙令人聞風而激感然而生不得展布歿無所表揚惜哉其在龍灣衣袍盡弊上念其寒賜之疋帛公辭不受獻詩曰一身寒凍猶微事願作南征將士衣上謂相臣鄭澈曰卿嘗以清忠自許某也殆亞於卿矣有遺稿幾卷余嘗讀寸草軒賦知公之孝見龍灣述懷賦知公之忠嗚呼是可以不朽公矣

清江李公墓表

余旣撰恭度公鄉祠之碑其後孫邦繼達運又拜而請曰某之七世祖清江公卽恭度公之十世孫也克

趾先美有學有守爲一方所敬慕而尙闕表墓之文願得大人一言之重以終惠我李氏余不敢固辭而按其狀公諱昇字景瞻仁川之李爲麗朝之大姓高官相望至恭度有六子皆顯第四子同敦寧孝智之後居湖南之長興世爲儒業有曰斗隱居尙志自號栗亭卽公之大父也父曰大旬妣曰山陽宣氏大倫之女公生而穎秀七八歲能誦小學親有疾斫指灌血與兄居食共床臥共衾白首怡怡鄉人稱其閭爲孝友里嘗就同郡人見其壁有題詩卽鄭賊汝立客所作也公嘖蹙曰此人所從遊吾素知其非吉人今

見其詩果然卽令刻去其後安牛山邦俊許以先見書之已丑錄宣典籍世徽卽公表弟也附大北得魁科來見公公拒不納甲子逾适叛靈光進士辛應純倡義募衆公與數三同志奮起先赴將並力勤王者會亂定而止公少有志於實學不求進取丙午成進士遂廢舉讀書深於易學壬辰之亂臨危撰著避凶就吉一家賴以獲全鄉人咸矜式焉稱清江先生以遺逸薦授直長不就以萬曆戊午八月十六日終享年六十二有二男榮仁名仁公中歲臨溪構亭扁曰讀易樂以終老必有自得於中者而所論著不傳惜哉然竊觀其識能辨凶徒義能斥奸黨忠能赴國難智能避危邦非精於幾微悔吝之義者能如是乎斯不可泯沒不章遂書以表其阡

竹陰李公墓表

余嘗宦遊湖南循蘆嶺而下遵海而南見其山川明麗人物穎秀意其地靈所鍾不獨在於橘柚之華竹箭之美也是故國朝以來名賢輩出及中仁之際尤蔚然而盛有若柳眉巖金河西最其傑然者也眉巖河西有同志之友曰竹陰李公公諱萬榮字盛卿本咸豐人以高麗神武衛大將軍彥爲上祖有日光



逢策壁上勲封咸豐府院君暨本朝有曰岸在 莊  
陵朝忠正公朴彭年薦學行除叅奉 光廟受禪謝  
官南歸自號穎波亭再徵以臺官不就卽公會祖也  
祖諱桂亨副司直考諱碩成均生員受業於寒暄金  
先生之門戊午禍作卽廢舉歸隱教七子皆成名公  
其第四也妣錦城羅氏進士贊之女公生於正德庚  
午德器天成羅松齋世纘卽母夫人從昆季也甚愛  
重之一日方伯過松齋見公容止端詳竦然異之命  
題賦詩輒應口而成自是聲名大播十九歲丁父憂  
執制不懈葬距家五里晨往拜哭三年如一日母夫

人性嚴訓七子以義方置三小齋於園課以經學公  
之兄弟文學皆顯於世蓋有所本云嘉靖戊戌魁別  
試慕齋金文敬公素有神鑑主文擢公置上第見公  
名喜得人公以座主往拜之因請教文敬曰吾黨有  
金厚之可從遊厚之卽河西金先生字也公素與河  
西相知遂定爲道義之交柳眉巖希春李靜存湛皆  
南中名流也公常與講質經義眉巖每稱公李狀元  
河西尤深許之與之連婚方公登第也不待榜而歸  
與尹復丁璿同渡漢津泮隸數人持榜過去公披見  
則公名在首尹與丁亦在榜中公漫無喜色泮隸不

省而去尹丁向公致慰語公笑應曰得失命也尹丁後覺之大驚此與退陶先生司馬時事相類人至今傳說歷官成均典籍兵曹佐郎司諫院正言侍講院司書成均館司成癸卯以書狀官朝京甲辰還朝見時事大變乞外出宰金溝河西先生送之以詩有恨不身從去鳥飛之句河西繼有玉果之行當時論乙巳名賢以河西爲完人而以公金溝之行匹美焉在官一年卽棄歸婢僕皆步隨邑人稱其儉德丁未五月二十一日考終于南山之第享年厯三十八公早襲家庭之訓輔以師友之益沉潛性理篤志力行其

進不可量而天不假年官不稱德惜哉公娶瑞興金氏將仕郎守欽之女舉三男三女男長玉僉知中樞次璫文科觀察使次琬魁謁聖科旣坼名拘格見拔更不赴舉女長適校理梁弘度次適贈叅議宋鵬彪辛永吉玉一男弘諫生員一女適吳以省璫一女適贈領議政高因厚琬二男弘誠通德郎弘說察訪二女適羅逢緒李成檜曾玄不盡記葬公于郡東六德洞金淑人祔焉公之世代旣遠文蹟散佚後孫澈仁掇拾諸名賢文集及輿覽邑誌哀公言行千里來乞言先輩之狀與銘備矣不佞復何贅焉謹敘其交遊

耳溪集 卷三十五  
之盛出處之懿以表其阡使湖南士大夫知所觀法焉

桐江處士李公墓表

我王考芸窩府君嘗從芸齋李公遊推以文章先進李公之孫桐江處士繼從我王考遊質難經史長牘聯翩良浩不佞修三世好亦得拜處士於終南之廬圖書靜嘉言動有則心竊慕焉顧年尚少未及叩所存而聞緒論公歿垂三十年嗣子奎彬條公言行求所以表阡者嗚呼其何敢辭公諱澆字士浩德水大姓中郎將敦守大提學仁範世顯于高麗康平公明

晨德豐君通最著於我朝曾祖諱喜相官縣監祖諱坪卽芸齋官佐郎以博學高行名考諱鳳鎮有文無年娶潘南朴氏泰徽女以 肅宗辛巳生公秀而藝弱年屢發解旣而不屑也治古文辭李西堂德壽趙東溪龜命亟稱之又棄不屑也乃以小學書律身以文公禮型家大學中庸爲入道之蹊復性踐形爲成德之符閉戶潛心粹如也敬庵尹公東洙甚重之其事親也病而三血指喪而聖處三年脚中濕不良鄉黨莫不感服尤深於禮書蒐羅貫穿裁析經變凡有吉凶疑眩者輒就正焉名士大夫墓道之文多屬於

公然貞介自守安貧樂天以終老焉及病革家人進藥公於掌上書知天命三字以示之翛然而逝平日所養斯可知已以已卯六月九日卽世所著經禮說詩文幾卷藏于家元配海平尹氏無育繼娶達城徐氏府使命茂女舉一男奎彬也合葬公于清州孤鶴洞負乾之岡奎彬二男晚隄女歸進士鄭東益柳鎮學側出二男旼曠晚子弘圭奎彬少孤克家述先德甚詳而又乞言鑿石將壽其傳公可謂有子矣

閒雲居士尹公墓表

不佞少時執杖屨於伯舅沈先生之門得識士友之從學者有尹公聖在居同郡志行甚篤先生亟稱之公於不佞先進也會合稀濶見公顏髮向衰而志氣不懈心竊敬之及先生下世同門之士散居四方余與公不相見亦數十年而老猶不倦享大耋以終公之孫宗五具公言行來訪於漢城余雖未及執冊講討而有同門之誼其何敢辭公諱璿聖在其字也系出坡平高麗太師尹公莘達之後也爲東方大姓入我朝冠纓不絕正言諱益亨號暇休堂寔公高祖也曾祖諱磻贈承旨承旨公長子諱就明贈叅判次子諱就文僉知中樞府事僉知公無子取叅判公次子

諱楫爲後卽公之考也妣李氏讓寧大君之後學生重休之女公以 肅廟乙酉生幼而俊邁僉樞公撫頂而奇之及長負笈於樗村先生之門與子弟門生同居共業爲儕友之所推間遊同郡遁谷李先生之門遁谷卽樗翁之友也二先生咸稱某見識明操守端後生中不易得者也公以親命雖治功令赴舉而非其好也及兩先生歿遂杜門謝世優游卒歲而以繩墨自持必晨興盥櫛整襟讀書常語子孫曰小學者作聖賢之基一自世教衰學者鮮有從事者甚可慨也常舉經訓中句語曰此訓義所受於樗翁者此

訓義所受於遁翁者明釋旨意多發前人未發之奧雖當八耄之齡每於月夜高聲朗誦詩書往往有手舞足蹈之意其有得於中終老自樂可知也一鄉章甫列公行誼屢薦於縣道而非公志也終老山中世無知者惜哉疾瓴戒宗人初終必稱家而從薄呼寫告祠堂曰某月某日孝孫某殞命悠然而逝其平日所養可知也葬于安城大門里孺人德水李氏靖國功臣海豐君菡之後通德郎埤之女也淑慎柔嘉甚有婦德生先公二歲卒於辛巳公之葬穿壙左而同穴焉舉二男三女男德師德履皆早歿女婿鄭世煥

李觀涵李時根德師有二女而無子取長姪德培之  
子宗五為嗣女歸李箕鎮李在植德履無後公姿性  
峻潔儀容願莊篤於內行奉先之節誠敬兩至八十  
之後忌日素食將事如少日常恨我東宗法之不講  
議于諸宗立宗憲篤追遠之誠成敦宗之誼親戚故  
舊之貧不能婚喪者極力救助鄉黨感服以所居里  
稱閒雲居士

鶴洞李公墓表

公諱志長字而遠嘗居漢城南山青鶴之洞因以自  
號明谷崔相國錫鼎贈之以詩曰南郭道人聊隱几

西川處士不開簾吳西坡道一和之曰春園穩理宜  
蘭畝夜榻閒褰可月簾一代名流爭步其韻而酬之  
定齋朴公泰輔作記而揭之曰使而遠策名於朝將  
為王國之瑞不幸年不永而無所成名士友至今痛  
惜焉公碧珍李氏平靖公約東之後也平靖生翰林  
紹元冠纓不絕至曾祖敏善官縣令贈叅判以文學  
德行為士林所宗號曰北峰祖諱尙逸江原觀察使  
以清德名號曰龍巖考諱墀司憲府監察 肅廟已  
巳 仁顯王后遜于瑤華公棄官南下築小亭以終  
老自號曰晚香堂妣安東權氏都正順昌之女以庚

寅二月二日生公自在襁褓穎秀異凡八歲賦雪曰  
白雪滿天地千林玉作花觀察公撫其頂曰大吾家  
者必此兒也辛亥觀察公邁厲瓴公齋沐祈天俄而  
喉中有聲因而得甦人謂公誠孝所感姪子世琬早  
孤取以養之教導至於成就孝友之行人皆歎服持  
身簡飭嗜學不怠嘗欲築室巖壑讀書求志而監察  
公從仕京輦故不敢違親庭見鶴洞幽篁買屋而居  
之滿園花竹四壁圖書一室蕭閒入其門者莫不洒  
然起敬目之以城市間隱君子迂齋趙公持謙公之  
妹婿也嘗比之以冰壺秋月每從觀察公任所十年

廩養而歸則食貧處窮所居草屋不蔽風雨常謂家  
人曰吾家長物只個清儉訓子弟每日士生斯世逢  
時立揚利及生民實爲丈夫事業而事與心違時不  
我與則終老山樊嘯咏自樂亦士之本分其志尚之  
高邁如此年四十一卒于鶴洞寓第當其鞫還故山  
搢紳章甫相告以賻襚之明年葬于監察公墓下巽  
坐之原配義城金氏吏曹叅判守顯之玄孫進士庭  
碩之女事舅姑盡其誠處妯娌得其和奉先祀遵家  
禮教諸子以義方以丁酉四月二十六日卒與公同  
窆舉二男世琚世珩二女適進士安宅仁士人金宜

正溪集 卷三十五  
鍵側室男世珉女朴命新世秘男挺泰挺岳女呂善  
望世珩男挺洛女朴師周俞天柱噫公以平靖公之  
耳孫晚香堂之肖子早有譽望爲時所推有志無年  
豈非命耶然諸公之所紀述亦足以表見於世其視  
沒世名不稱者得失遠矣謹以刻諸墓石用示于後  
人

太學生金君墓表

忠原金元直余畏友也嘗謂余曰吾阨于時無慕於  
外惟樂於家而忘其窮者有賢弟在讀聯床寢同被  
至白首怡怡也余聞而歎曰君子有三樂王天下不

與焉而兄弟居其一况賢而益者乎詩云伯氏吹埙  
仲氏吹箎元直之謂也居無何聞有金士宜者以文  
鳴於世卽元直之弟也因從士友間識其面益知其  
賢宜元直之樂有是弟也一日元直訪余於漢京泣  
言曰吾弟不幸亡矣甚哉吾之窮也唯其才與行有  
不忍終泯者願得一言以表其丘隴余旣惜士宜之  
死悲元直之言乃掇其遺事而敘之士宜名義之新  
羅公子周元遜國東之溟州卽其居封爲郡王溟州  
後稱江陵遂別族爲江陵之金其後入高麗有侍中  
仁存以文章勲業大顯暨我朝冠纓不絕正言諱世



王溪集 卷三十五  
行掌令諱始徽卽君祖考曾祖也父諱壽龍進士志學而蚤卒母驪興閔氏郡守最重女士宜生而聰警四歲而孤不待教督力學如嗜好甫冠詞藝壓輩類詩亦適敏或一韻三四十疊汪汪不竭大學士李公匡德簡亢寡許可見君文稱以奇才 英宗庚申魁增廣解額翌年中生進兩試聲名大播其爲功令徧工各體而尤長於駢偶嘗遊泮宮操觚之士爭就式焉咸曰金某爲文如長桑子之視垣獨專其妙屢舉庭試泮製凡十餘選竟不中第每揭榜多士相謂曰金某又屈吾曹不足言也考試者至欲物色焉君覺

而避之可見其窮而有守君旣老無成乃自號曰秀野居士歸于鄉與伯氏居講討經史消搖江山以自適歿於壬辰十月二十日距其生六十二歲葬于忠州省台陽茂洞君娶草溪鄭氏鳳柱女無子取從弟子昌漢子之一女適士人朴敬源側室腹子君歿乃生悲哉君少有至行居母憂三年素食不去衰旣免喪及歲除必詣親墓明燈待曙哀省而歸伯氏長一歲事之如嚴師動靜無違憂樂與共孀姊貧無依君躬往致之家撫養諸孤皆至成立由是鄉里服其孝友聞君之歿士友之操文來哭者相接於道泮隸之

識君面者皆為出涕其質行之孚於人如此宜乎元直不忍其湮滅也余亦亡一賢弟者也每讀死喪孔懷之詩未嘗不掩卷於邑今述士宜之狀尤為之戚戚焉噫吾弟之賢不後於人而得年不及士宜之半又無一箇遺體則其視士宜何如也自古賢且才而無命者不獨士宜也是可以慰逝者之恨而寬元直之悲矣元直名敬之登高科宦不遂退而讀書求志以經術重於世

李君昌之墓表

余少侍伯舅沈先生於安城之樛村樛村之友曰副

率任公任公有婿曰李文祐昌之從任公居安城昌之雖未嘗挾冊受業於樛門而先生嘗稱其器局余遂與之交善如同門之契既而先生棄後學及門之士散歸四方昌之時或來漢京訪余語及往時事相與愀然歎吒及昌之歿其胤在川兄弟修舊好一日齋家狀來屬表阡之辭余何忍辭謹按李氏貫龍仁以高麗太師吉卷為肇祖入本朝簪組蟬嫣為盛閥大司諫士慶暨子開城留守後山最著是為五六世祖也高祖諱舜岳司饗院僉正贈吏曹叅判曾祖諱世大祖諱宜復成均生員考諱普憲 崇陵叅奉妣

曰坡平尹氏正郎東泰之女以 肅宗戊戌生公卒于癸卯八月四日葬于安城北里卯坐之原配豐川任氏翊衛司副率思敬之女舉三男在川在淵在田側出二男在臯在坤二女歸朴敏謙趙顯求公儀觀偉碩性度通儻羣居談笑意氣傾一座與人交洞見城府人皆相得驩然篤於孝友推以惇親一門同爨殆百口而勤力農桑節用以自給未嘗乞貸以殖利樂善好義急人之窮如嗜欲故鄉中無不感服親喪吊客填門極力庀助識者許以時平可作度支世亂可任笠轂早廢舉以布衣終身才未試於當世惜哉

余尤所感服者一自樛村之喪門戶傾敗門生故吏無人乎過而問者惟公不失舊誼撫孤恤喪一出於誠有古人風非識量之弘操守之確不以死生夷險變者能如是乎噫以公之才無所表見於世必有遺贏於後者公之三子皆能劬躬績學庶幾振其家聲余方傾耳以俟之謹書其平日事行不容泯滅者特表其墓前

景心齋洪公墓表

公諱重肇字汝開我洪系出豐山高麗狀元國學直學諱之慶爲鼻祖寔生舍人諱侃號洪崖卽公十二

代祖也其後連二世入館閣高祖諱履祥魁文科官都憲贈領議政諡文敬號慕堂爲宣廟名臣曾祖諱霽蔭府使贈左叅贊祖諱柱震文科獻納號梅沙考諱萬尙進士前妣安東權氏都事佑女生妣陽城李氏世衡女景廟癸卯生公于忠州荷潭卒于英廟戊子享年止四十六公娶高靈申氏思樸女大司憲湜六世孫生於景廟甲辰卒于丙申與公同葬于忠州清明村亥坐之原舉二男二女男寬輔完輔女適金得雨李鼎五進士寬輔一男恩浩完輔一男心浩金有二女適韓致性許佻李有三男一女男

錫龜錫麟錫龍女適朴基復公天姿仁厚豈弟孝友根於天植弱齡遭外艱隨兩兄居憂晨夜哭踊旣葬每日省墓母夫人柴毀成疾公時以童子絢繩易鯉以補元氣賴以獲痊及長與伯仲氏共居一室家雖窶寒至誠供親人多感其孝而助菽水之資甲戌母夫人疾甌公未嘗解衣安寢及遭巨創枕苫泣血草薦盡濕以先塋不宜合祔訪堪輿於湖南以所乘樸馬讓于地師時當溽暑曳衰徒步地師亦感歎求占吉地以至完襄中年連遭伯仲喪事丘嫂如事母宗家大事無不盡心措辦兩妹弟姪殫誠教導皆得成

王溪集 卷三十五  
婚及闕內艱因寓居贅鄉環堵蕭然不蔽風雨人不  
堪其憂而處之晏如案上常對明心寶鑑一書自號  
曰景心齋公久客異鄉人有勸歸荷潭舊居者公垂  
涕言曰吾家世貧只有數畝薄田半弓荒園吾又孳  
家則恐貽累於宗姪矣與季氏比隣而居教育子女  
湛樂融如人不知誰爲子誰爲姪也自永感之後雖  
至親居外邑者不以貧乏相干焉或有餽問者輒付  
宗姪以養老嫂以是遠近隣里常稱敦睦之風有婦  
從弟申甲權貧未室將過時公親媒婚家適得民籍  
雇書錢公與兩家俾成醮禮其仗義好施多類此季

氏適往嶺外中路奄忽公以運柩營葬之事日夜焦  
思宿疾復添竟至不起知舊皆爲之哀慟無異親戚  
焉公孝友篤摯厚於人倫處宗族以嫻睦交朋友以  
誠信樂善好義安貧疎財雖不以學問自處而其實  
心實行可謂無愧古人矣族姪鑑輔素以敦厚名於  
宗中嘗爲清州牧感公行誼頻餽養親之需公雖謝  
其意終不躬跡官門李獻納萬應同鄉老成人也常  
謂人曰某之篤行厚德必有後矣可見平日見孚於  
親戚鄉黨如此夫人貞淑端莊婦道備至博古識今  
有女士行躬執織紡拮据家產弟姪婚具手自措辦

耳溪集 卷三十五  
一遵公意人謂刑家之化行於閭閻云胤子寬輔具  
公言行來見良浩曰吾先君窮居鄉曲享年又短無  
以表見於世願得公一言之重以賁泉塗良浩雅聞  
宗族之所誦慕者謹撫實而敬書表之墓石以詔後  
人

贈左叅贊姜公墓表

姜友夏余童叻友也少而同研長而同官老而同者  
社情好親戚如也嘗獲私於尊公器宇偉碩言語恂  
恂有古長者風心竊敬焉公歿未幾友夏釋褐揚名  
遍歷臺省秩至正卿馳贈累塔常以祿不洎爲至恨

求余言以表隧道余何敢辭姜氏肇於高麗元帥以  
式世襲簪組至大提學淮仲始大顯入本朝有諱澂  
禮曹叅判叅判第二子正言億寔公本生六世祖也  
正言弟教官儼寔公六世祖也正言子應教德瑞子  
禁府都事胤祖生諱恰以前縣監遭丙子難慷慨不  
仕隱於山中世稱太白山人生諱郈生諱再亮卽公  
生考也妣昌原黃氏察訪玄顯女教官子生員君瑞  
子宗說靜處默修號守拙齋著家訓以傳世子諱愷  
子諱益九贈左承旨子諱震耆贈戶曹叅判卽公考  
也妣彥陽金氏振海女公生於 肅廟丁卯出繼叅

王溪集 卷三十五  
判公後自安東移利川卒於英廟丙子十二月二十六日葬于利川安谷負辛之原公諱福一字汝則孝友根於天性幼失母終身含恤旣白首見人喪母者輒流涕六旬遭金夫人憂盛暑衰絰朝夕上墓宗黨咸曰得繼子如某死無憾矣本生兄弟窮無以爲生聞病則越嶺往護之及喪手自營辦買田業其家或育於家未娶者擇配而成就之一姪客歿躬往返櫬於千里一姪死無以斂脫單衣而殯之內行之懿人皆謂不可及接人一於誠恪卹窮不計有亡人服其厚德少業文記性過人詞藝爲先進所詡間相發

解而未成名知公者皆惜其屈然子孫盈前嗣子登顯推恩三世克振家聲不食之報於是乎不僭矣配豐川任氏學生聰女甲午歸于公事君子無違志喜慍不外形常戒子女勿言人過失宜其媿德而燾後矣生於乙亥卒於丙子先葬於某山後移祔公左舉二男五女長游卽友夏文科漢城右尹年過七十秩資憲知中樞府事次湜從仕郎女歸吳彥鎮崔澮李有祚金履遠李泰緒游二子彬琳湜二子杓根嗚呼公以仁厚宅心恭儉傳家友夏承以文行壽祿俱備諸子皆惇實孝謹不墜先訓公之遺諸後者其猶未

耳溪集 卷三十五  
艾矣乎

誠菴韓處士墓表

定平韓處士名思喆字誠之號誠菴年二十不屑科業有志求道南踰鐵嶺走千餘里謁樗村沈先生於安城受大學臨歸先生贈詩曰天地無心自至公山川不隔古今同脩途遠涉還多事師友爭如小學中處士奉而還鄉杜門靜養講學不輟後復來謁先生欣然喜其至授心經近思錄諸書先生又以詩贈之曰看君志欲古人如不必求師自有餘且莫懸懸勞遠夢閉門深讀聖賢書又曰養正元來是聖功祇應

努力更專工人將千里看惟遠天下何曾道不同又書贈敬直義方四字曰誠之一生用功在是又曰自得誠之北方無憂後聞先生病篤復跋涉來謁先生強起而坐曰自君之去一念耿耿今又遠至可謂知我者矣因書心性圖說以送之後北士李克已謁先生而歸先生手書麗澤齋三字曰爲我授韓誠之無負付托之意先生諱音至作奔哭之行加麻操文治任辭歸與李克已韓楫同建書舍講道修己體先生遺托爲終老之計所著有朱書要義易學演義洪範衍義圖說若干卷處士生有異質穎悟出人年未弱



冠文藝夙就及造樗門學益篤遭其大人憂廬墓泣血讀書砥行名聞一路李公壽沆李公宗城迭按本道薦于朝後拜安陵叅奉以親老在堂黽勉從仕而旋即辭後又甄復除奉事以壽陞通政生於壬寅卒於丙辰年七十五矣韓氏系出清州以太尉蘭爲始祖有諱連始遷于北仕麗朝爲禮賓尹有曰安原君諱裕曰左政丞諱珪仁曰安川府院君諱卿三世大顯十一傳至諱彧以壽秩資憲諱晉泰諱緒卽處士曾祖祖禰也娶南平文氏通德郎在周之女生四男三女男曰浩洙溥淳女適朱南禧金基安李敬民

余少時見處士於樗翁之門先生稱其篤志好學與之遊容儀莊肅持守矜嚴心竊敬之其後往來門下輒歷訪于漢京余貶官于北塞處士遠迎於楚原請其大人墓石之辭志氣昂然老而彌堅不負師門之教矣及處士沒其子淳千里繭足來求表其阡者余愴然興感爲敘平日所聞於師席者以贈之淳年少而有志能傳其父學者也

耳溪集卷三十五 終

耳溪集卷三十六目

諡狀

正宗大王諡狀

江寧都正諡狀

錦城尉朴公諡狀

左議政李公諡狀

耳溪集卷三十六

諡狀

正宗大王諡狀

國王姓李氏諱某字某 莊順王之孫以壬申九月  
 二十二日 王生始 莊順王長子 恪愍王某以  
 世子戊申卒 次子某封世子壬午又卒有子卽  
 王也初封世孫 莊順王命爲 恪愍王後丙申  
 莊順王薨 王奉大朝命承襲奏請追尊 先世子  
 爲王 母妃趙氏左議政豐陵府院君文命之女  
 本生母洪氏領議政鳳漢之女也 王幼有異質聰

王漢集 卷三十六  
睿絕羣器度岐嶷 莊順王奇愛之常置左右教以  
文字聞一知十過目不忘孝經小學語孟毛詩諸書  
次第通貫文理日就不待勸課孜孜不懈辛巳齒于  
學謁先聖禮容嫺雅講音清暢環橋多士莫不延頸  
而拭目焉是歲行冠禮妙選經術之士文學之臣列  
置僚屬日夕討論俾盡輔導之責自是知見日廣識  
解益精六經諸子史傳百家博涉旁通靡不掇其要  
而會其歸宿儒老師亦不能企及壬午行嘉禮 王  
妃金氏左叅贊清原府院君時默之女也 莊順王  
年高倦勤乙未命 王代聽機務 王懇辭不獲裁

決庶政莫不當理國人咸服 莊順王寢疾經年  
王日夜焦憂扶持調護不解冠帶既革遣大臣禱于  
廟社山川及遭大憾哀毀踰制 祖王妃奏請承襲  
大朝降勅曰 王妃金氏奏稱爾自幼聰明性敦仁  
孝夙有長人之德爲國人所願戴請冊承襲朕俯循  
輿情特許所請茲遣官賫詔誕告爾國封爾爲朝鮮  
國王謹理國政封爾妻金氏爲國王妃佐理內治並  
賜誥命綵幣等物爾宜永矢靖共懋績承於侯服迪  
宣忠順作屏翰於天家欽哉毋替朕命於是大臣禮  
官齊請嗣服 王號哭不許及百官庭請數日然後

皇漢集 卷三十六  
始勉從之受羣臣朝于崇政門逮至發靴步出宮門  
中夜露立哭不絕聲朝夕祭奠必皆躬親哀動左右  
王旣卽阼勵精圖治克遵先猷發號施令動合羣心  
百工率職四境無虞民情大悅翕然稱明主焉上奉  
祖王妃暨本生慈母昧爽必興冠帶問起居承顏順  
志誠孝無間左右怡愉忠養備至宮闈之內和氣藹  
然生辰及歲時錫類之恩遍逮羣下朝士與庶人耆  
老或加資級或賜米布民皆興於孝其奉先也 宗  
廟禴嘗輒皆躬行致齋虔誠省牲滌器一一親視徹  
宵將事致愬著存在位執事莫不駿奔肅敬率禮無

愆或有故攝行則必手傳香祝離次齋居遣近臣徹  
察禮式明燭以坐待其歸奏虔奉 園寢輪行展省  
一草一木無不愛護至於本生之親常以未逮千乘  
之養爲窮天之痛別建 廟宮月必瞻覲歲謁衣烏  
之藏以致攀慕之誠每於拜省之時涕淚汎瀾近臣  
不忍仰視銜恤茹哀終身如一而祀享之禮一遵程  
子定論隆殺有節情文允協咸仰 孝思之通神夔  
越往牒矣以至國社山川百祀莫不致敬遵禮上辛  
祈穀每歲 親行階設儀天之器庭豎占風之竿夙  
宵對越雨暘順軌或有水旱之災圭璧徧舉殫誠盡

王溪集 卷三十六  
心故孚感如響焉若夫事大之禮尤極盡誠謹修侯  
度慎簡使价時節朝請未嘗愆期進獻方物身親檢  
視凡遇慶賀或蒙恩典別遣大臣以伸頌感之忱詔  
使之來特命上卿遠逾境上館待之節饗餼之需虔  
潔敬慎及到王城親迎郊外宴饗備禮送亦如之克  
致恪恭之誠以是最被高宗純皇帝眷恤之德視同  
內服寵賚便蕃特賜御筆御詩福字寶箋以推敷錫  
之化引接陪臣每詢安否至及於嗣續之喜冊儲之  
期恩禮曠絕迥出尋常匝域臣民至今感戴若其好  
學之誠根於天性心無二用手不釋卷聽政之暇日

有課月有程夜分不輟上滂堯舜傳授孔孟謨訓下  
及宋賢心性之說微辭奧旨無不心悟體驗折衷異  
同發前未發辨析羣疑洞徹大原嘗謂孔子以後集  
大成惟朱子而已推尊敬慕專心誦法隻字片言蒐  
羅哀集常日在案融會貫通動靜語默不違繩墨政  
令措施皆合典謨此其平生學問之本領而致明體  
達用之效者也於以反躬實踐檢身如不及制行有  
常度不邇聲色不喜遊畋宮室衣服一從樸素常居  
卑狹之室每御澣濯之衣蓋其素性初非勉強而然  
也發爲文辭出言成章教令一下人皆莊誦凡有著

作若決江河浩瀚醇雅自中軌範義理明暢文采彬郁綽有周漢之法一洗叔季之陋建閣于內苑貯祖先謨訓古今圖書簡選一代博學宏詞之臣日與講論經史叅贊治教又設講製之法勸課文臣親自考正才彥蔚興雖在燕居召接士大夫之時常多而替御近習未嘗廁於其間以至縫掖之儒聚之學宮教導作成間年躬謁先聖釋菜視學論經設科月朔則講書課製身任君師之責悉遵成均之制士習咸正文風大振乃於暇日編纂羣書手自點選發揮聖賢之微言闡明道學之淵源此乃推躬行心得之餘

嘉惠後學者也若其勤政則寢殿書揭無逸篇以自警省每日視朝未明求衣羣有司各執其職進前奏事親自剖決日晏乃罷而或有民事之急者雖值深夜許令直奏以爲生民休戚專係近民之官監司守令之差遣也輒召接面飭或有因事赴朝者亦卽引對問民疾苦詢年豐歉時遣御史廉察幽隱刺舉非法嚴贓污之律獎廉謹之吏德澤下究葑屋安堵廣開言路翕受敷施雖有直斥闕失犯顏不諱者亦必包容寬假未嘗有以言獲罪者而時或下令求言無遠不達若遇災沴則避殿減膳罪已修省惕然警動

王漢集 卷三十六  
不敢違寧求賢如渴用人無方不以疎遠惟器是使  
故一藝寸技各效其長草野寒峻無不彈冠競進嚴  
飭朝臣寅協和同莫售朋比之習咸囿平蕩之治或  
有干紀犯憲者雖在貴近一斷以法王綱於是振肅  
深懲史牒咸曉干政之弊告戒斂戢以盡全保之恩  
至於宦寺之類只備灑掃之役不任職事毋敢與外  
臣交話家法之嚴有如是矣常謂誠小民爲祈天命  
之本發政施仁必以正經界勸農桑爲先改正田案  
頒降農書野無曠土田無濫稅每於歲首別下教命  
申飭牧守身作田峻勸耕借種無或愆期若值旱澇

之時輒下蠲減之令詳察災荒發倉賙饑移粟往哺  
至發內帑助其不給罔有流散捐瘠之類以至窮民  
之婚葬過時者採聞資給孤穉之顛連道路者收養  
保活民塚之頽圯露骸者官庀掩瘞山虞之獵貢海  
氓之魚稅或罷或損俾無一夫之失所方伯守宰一  
或犯科勘以重法以勵具僚故窮峽絕海之間道無  
竊發戶不夜閉惠澤洋溢民皆樂生又謂刑者輔治  
之具嗣服之初首定笞杖之式印行欽恤之典尺寸  
無違情法曲當每斷死罪三覆閱實必求傳生之路  
以盡哀敬之義祈寒盛暑則疏放輕囚掃滌囹圄俾



耳溪集 卷三十六  
無痠病之患爲治之法必先於正俗正俗之道莫大於孝悌故以身先率自家而國朝廷敦禮讓之風閭里謹少長之別而申明教條頒示中外採輯古昔哲行懿蹟編書刊布家諭人誦服習爲常郡縣行鄉約之法黨塾肄飲射之禮德教所被莫不觀感而興起風俗駸駸丕變矣又以褒獎名節爲立教勵俗之本前代守節之臣本國立懂之士暨夫閭巷孝烈之卓異者搜訪表揚大則贈官錄後小則旌閭給復樹之風聲人皆激勸至若僧尼巫覡之屬一切禁斥俾不得出入城闔焉於是化行俗美政成治定踐阼二十

餘年之間日慎一日乾乾不懈不幸於庚申六月感疾方在寢席猶問左右曰事關民憂者毋滯卽告二十八日 大漸薨于昌慶宮之正寢春秋四十有九臨終大臣近臣禮官俱入侍是正終之禮也自王都士庶至于窮巷幽谷婦人孺子莫不奔走號哭如喪父母可見至仁厚澤入人深也 元嗣某以 曾祖王妃命權署國事嗚呼 王以聰明英達之姿有純粹光大之德典學之念罔間終始律身之嚴一循聖訓窮理則造高明溥博之域反約則極精微縝密之功動作不踰規繩辭命皆可師法此乃前古后王之

所罕聞而大德宏規臣隣莫能形容摸寫者也試言  
其見於行事則孝爲百行之源而事親有格神之誠  
仁爲衆善之長而愛民若赤子之保窮經闡性命之  
奧立政明王霸之分崇正學而斥邪說建大中而敘  
民彝文章煥乎黼黻聲烈流於金石環東土數千里  
無不沐浴乎膏澤衣被乎光華皇天竟靳遐齡未及  
見久道化成之懿臣民之痛曷有其極詩曰瑟兮僯  
兮赫兮咷兮有斐君子終不可諉兮者道盛德至善  
沒世不能忘也其斯之謂歟於乎盛矣

江寧都正諡狀

洪惟我 世宗莊憲大王克有聖德受天景祿本支  
之盛遠配姬文王子王孫咸有令望有若十七男寧  
海君諱瑋最賢而無年寧海之子永春君諱仁亦世  
其德得諡穆成娶晉州柳氏尙衣院正壤之女舉四  
男公其仲也公諱祺例授江寧副正自少志於學刮  
摩芬華律身以儒素一時賢士皆樂與之遊正德丙  
寅燕山主昏虐內嬖橫見人名園美宅輒奪而有之  
公居第亦在其中而獨不肯與內嬖許公以有怨語  
主怒下公獄鞠奴以烙刑奴至死明公誣得減死論  
杖配絕島穆成公及兄弟皆坐流未幾 中廟靖國

卽宥復前職特旌奴閭以獎其忠事載三綱續編丁卯遭穆成公憂已巳服畢當是時靜菴趙先生以道學倡一世公少嘗友善講劇理義及先生際遇日隆圖興至治公乃與詩山正正叔嵩善正濃長城守儼編刊程朱封事以獻于上曰爲國之道無過於此上嘉之賜書籍詩山卽公之從兄而嵩善長城亦當世之賢公子也金冲菴淨朴訥齋祥上疏請復慎妃正坤位臺臣論劾二公被鞫遠配趙先生斥臺言之失公復與三宗抗章極言二公之不可罪隨事匡救盡言不諱而論議嘗與趙先生合羣姦嫉之目爲

朋黨及已卯禍作公謂人曰北門潛入僭於東窓奸計已而大司憲李沆大司諫李蘋等合辭構趙先生竟致之死因劾公及三宗以附黨干政並請投竄遂與陰崖李耜灘叟李延慶等二十人同日削黜明年嵩善坐事謫又明年詩山辭連安處謙之獄被極刑而公與長城竟錮黜以終其後士論漸張靜菴諸公次第伸復至英廟丙寅追褒已卯人贈公都正今上甲寅大臣陳白特命賜諡于今二百年之後公議快伸榮名益光聖朝所以扶植崇獎無遺憾矣公之後孫最盛冠冕蟬嫣名卿顯仕鬱然相望至七世

而大顯翼獻公昌誼文獻公昌壽兄弟並時登崇乃公乃卿天之報施於是乎不忒矣文獻公嘗哀輯史乘纂公行狀其嗣子今冢宰秉鼎以余備官太史來徵易名之狀不佞竊觀前代宗室之賢而名世者莫如漢之河間獻王與宗正向而河間以明經醇行著宗正以文章直節顯如公殆乎兼之矣始當昏朝守正邁難及遭中興盛際羽翼善類力扶名論忠言懇懇欲致君於三代之隆而事有不幸志雖未成卒與靜冲諸賢流名千古豈不盛哉謹就其家狀撰次其大節以俟太常氏之採焉

錦城尉朴公諡狀

上之十四年庚戌三月乙巳錦城尉朴公卒于位其始病也 上遣太醫診視亟問之訃聞盡然悼之輟朝致吊 親製文賜祭命召弘文館提學臣良浩于承政院宣旨曰賢都尉亡矣將及其未葬議所以易名者汝其撰次事行以進臣恐懼不敢辭退按其遺事公諱明源字晦甫東國之朴皆出於新羅而貫於羅州之潘南者最盛在麗季有曰尙衷以師道名節稱潘南先生是生左議政平度公嘗以勲德相我獻陵又五世有曰司諫紹以經術直道稱冷川先生

耳溪集 卷三十六  
又二世曰錦溪君東亮以英達夙成稱 穆陵名臣  
錦溪之子曰錦陽尉瀾以 穆陵儀賓文章行誼重  
當世於公爲五世祖也僉正世橋郡守泰斗叅奉弼  
夏是爲高曾祖也考曰師正禮曹叅判以公贈領議  
政妣曰咸平李氏九畹春元之後學生宅相之女公  
以 英廟元年乙巳十月二十一日生骨相異凡端  
重有器度長老咸期以遠大戊午四月尙和平翁主  
封錦城尉 英宗大王眷愛之諸駙馬莫及焉嘗取  
覽其小像以 御筆書贊以賜之公以寵爲懼韜光  
守愚斷交遊絕言議貴主亦承公志錦綺珠玉不設

於身敬事舅姑執喪如禮 英考常稱其孝友根天  
戊辰貴主喪 英考屢臨視公攀 駕力爭又上疏  
請寢天怒爲震而人稱其得體是時公年尙少而識  
慮已遠暨貴主一心王室內外密贊宮闈之間事有  
至難而竭誠調護左右周旋戊辰以前和氣雍穆一  
自貴主卽世萬事嬗變而有非外臣所得詳者肆我  
聖上祭主之文若曰母曰婦人實關王室苟其在世  
豈若今日又曰戊年以前功著彌綸嗟天嗇壽在國  
不幸又於祭公之文有曰亦我令姑室家之宜隻手  
撐天人無間斯 王言一出公之爲國血忱與有不

運之功於是可默想矣丙戌 英考違豫彌留累月  
公入直侍疾扶抱抑搔晝夜不離 聖體甚安之既  
復常 上嘉賞亟稱其忠愛焉初授順義大夫旋加  
資義節次序陞十五年之間盡階至綏祿公早嫻筆  
札凡國有慶哀必差金玉寶冊銘旌書寫官前後十  
餘度輒承恩賞大而陞資小而錫馬兼帶則屢入都  
摠府提調于奉常寺典醫繕工濟用等監長興庫而  
在長興最久損浮費蓄餘羨庫藏充溢今 上夙知  
其賢禮遇加隆 文孝世子喪特差都監堂上董墓  
事仍差 魂宮享官命除夜直以優勞之宜嬪宮喪

亦命董事製進哀挽書表石乙巳公生年重回 上  
特賜米帛遣史官致問寵之以 御詩公感激異恩  
拜箋稱謝丁未貴主回甲日屆 上親製文祭之教  
政曹曰都尉子孫無登朝者可官其近親及冬又教  
度支曰錦城尉 先朝儀賓也年近七十自明年其  
歲致米肉公自以屬在肺腑厚被隆遇凡於國家典  
禮朝紳之所未敢言者義當無隱戊申上章請改  
義烈宮墓號 上優批從之下館閣議改進以宣禧  
識者韙之己酉五月 上幸文禧廟輦路近公第遂  
歷臨焉公惶遽出迎使之前待以家人禮寵數殊絕

仍以 御筆賜堂扁曰晚葆亭複製下律詩公叩頭  
泣謝鏤板敬揭以榮之先是 永祐園卜兆於東郊  
風水家多竊議之言 上以是寤寐殷憂而事體至  
重莫敢有言者公慨然抗章曰 列聖血脉之傳惟  
我 聖躬也四百年 宗社之托惟我 聖躬也  
園寢安然後 聖躬安 聖躬安然後 宗社可安  
而本支百世可期也仍備陳 園所之有四害請改  
奉善地 上感然動容詢在廷而亟從之遂命公選  
堪輿者徧審近甸卜吉于水原府治仍命公往來看  
董又命書 梓宮上字禮既成 上遣承旨傳諭曰

遷奉吉地都尉功也尋常效力猶且錫之鐵券田民  
况莫重莫大至尊至敬之舉乎特以王牌賜卿田十  
結奴十口婢十口白金一百兩鞍具廐馬一匹傳之  
永世公勤勞王事年旣衰病漸痼今春 園幸擬力  
疾從駕欲起而仆繞壁傷咄發於夢嚙旣革語從子  
宗岳曰古人多遺疏吾亦有平生所蘊結者而神精  
如此將不能辦 主恩未報是爲不瞑之恨身後勿  
受禮葬無片言及家事以是年三月二十五日考終  
于正寢 上下綸音以哀之凡三百餘言若曰生而  
三朝恩遇備至沒而摺紳輿僮嗟惜其生也榮其死

耳溪集 卷三十六  
也哀者都尉之謂也予之眷禮尤別昨秋以後視以  
恩人日前駕臨近洞及疾未革將欲一見史官回奏  
知已瀕危悵然虛還遽聞其逝不加殊禮何以表傷  
惻之意乎禮葬用一等柩材賜長生殿副儲祿俸如  
相臣故事限畢喪承重孫待終制加補敦寧叅奉內  
司庀衣衾加例度支供祭盡三年家人陳遺意乞寢  
禮葬 上特俞之俾成謙挹之志復命戶曹代輸米  
百石錢三千兩緜布麻布一千五百端內司遣官護  
喪無鉅細悉自公辦神道碑當下御製令本道趨葬  
前刻豎成服日遣近侍致祭公卿往吊下祭文又三

百餘言歷敘家行之懿謙約之操向國之誠蓋多勲  
舊之所未得外廷之所未聞者嗚呼盛哉公竟無嗣  
取長兄興源第三子相喆爲后文科廣州府尹側室  
四男宗善宗顯宗睿宗璉相喆娶縣令金簡行女短  
年無子以從子判書宗德第二子紘壽爲之后進士  
叅奉有男齊一公爲人外和內莊寡言笑持身有尺  
度而接人也溫然可親少日喜讀經史泛覽國乘淨  
几危坐竟晷不倦早入禁嚮寵光輝赫而兢兢抑遜  
不見貴介之容相喆妙年中庭試公憾然不安閉戶  
不接賀客唱名之日不設娼樂聞者歎服判書長公



耳溪集 卷三十六  
一歲而事公若嚴父事有不概公意輒猛加誨責及其迭長兩銓十餘年一不以私干其家法之嚴畏慎之操如此事親務先意養志及居憂六時哭泣哀動傍人躬審葬地十年看山數百里之內足跡殆遍友于兄弟事丘嫂如母寡姊貧無依爲之買宅而濟乏暨其孫廩養焉推以及於窮親貧戚有求必施空集如市其內行之篤如此三赴燕京律已檢下事無不竣庚子之行清皇在熱河時當六月淫潦三江泛濫莫敢放船一行皆欲宿留公促輿上船曰吾輩若畏死而僨王事生亦何爲遂縱纜前渡行至通遠堡水

漲過馬腹一行交請徐進以待清皇還都公曉之曰此乃國之大事皇帝若使致命於熱河而不及千秋節是委命於草莽也及到燕果有詣熱河之令遂克及期將事清皇大悅禮待倍加我使之叅內宴齒崇班自此始時清皇置西番僧於金屋師事之甚謹令東使往拜公辭以人臣無外交禮部屢督之經宿始黽勉往見危坐不拜彼人喝曰皇上猶叩頭頂禮况陪臣乎公終不動觀者相顧變色其當事之確又如此性喜儉約居處被服屏斥華鮮常着緜布衣袴平日未嘗以學問自處而雅喜恬淡每遇花辰月夕招

呼文士誦書哦詩畧設杯酌以助佳趣中歲卜一澗  
壑於東郊疏泉鑿池栽花蒔竹曳杖消搖蕭然有出  
塵之想風流韻致人爲之傾慕良浩初立朝望見公  
於班行豐額丹頰周旋有儀知其爲貴人中吉士也  
後嘗奉命廉察五江訪民疾苦過公別業竊聽輿人  
之言咸曰某都尉有時來居未嘗出大聲僕隸無一  
豪橫者良浩心獨敬服數十年不忘今乃承命撰公  
紀德之辭庶可無愧色矣竊覲公持身之操事國之  
蹟固多表著可書者而最其初年默贊陰護之功赤  
心炳然可質神明至若遷 園一疏又其至誠精忠

上叶天心克襄大事始則效力於人臣不能容力之  
地終焉建議於人臣不敢輕議之時仰慰 聖主不  
匱之思永鞏國家无疆之基雖謂之功存 宗社可  
也謹闡發微顯提挈而特書之庸告太常氏以備節  
惠之考焉

左議政李公諡狀

公諱思觀字叔賓姓李氏系出於韓山以高麗戶長  
允卿爲肇祖四世而有諱穀贊成事諡文孝號稼亭  
子諱穡門下侍中諡文靖號牧隱文章節義冠冕東  
方生諱種善仕本朝官知中樞諡良景以孝旌閭生

諱季甸策靖難佐翼兩勲領中樞韓城府院君諡文  
烈其後簪纓不絕七世有諱洽 宣廟辛卯以獻納  
疏救鄭松江因以牛溪之黨竄謫才宥而身沒焉號  
醉菴生諱義培策靖社勲封韓川君丙子難以公清  
兵使戰沒於雙嶺贈領議政諡忠壯卽公高祖也會  
祖諱穆弱齡遭适變罵賊不屈死仍兩世旌閭祖諱  
汝發知中樞韓興君贈左贊成遍管三軍以清白謹  
慎稱諡貞翼考諱基漢屢舉不中以蔭進官府使以  
壽階嘉善後贈領議政妣贈貞敬夫人全義李氏府  
使雲根之女有一男思胤官牧使出系伯父判書諱

基夏之後議政公無嗣以公系之本生高祖察訪諱  
敬培實忠壯公之兄也是生諱稔贈左承旨生諱汝  
哲通德郎生諱基聖文詞名世晚始登籍與世不苟  
合官止鍾城府使配淑夫人茂朱金氏學生琬之女  
以 肅廟乙酉五月二十五日生公容貌秀異聰穎  
絕人十三通四書二經綴詩賦表人稱神童弱冠發  
解未成丁府使公憂丁未荐遭議政公喪五年居憂  
專心經傳尤致力於易融會貫穿發爲文辭典雅贍  
暢已酉服畢登司馬一等丁巳別試對策陳時弊語  
甚切直人或勸之改公不爲動遂擢乙科第一人選

入槐院己未除栗峰察訪翌年罷歸辛酉拜 徽陵  
別檢甲子陞典籍歷兵禮曹佐郎通臺省屢擬而未  
受點丁卯始拜正言移吏曹佐郎八月拜茂長縣監  
己巳以持平召遭本生母喪壬申吉復拜持平因虹  
變上疏陳戒 上賜優批五月拜吏曹正郎時命修  
喪禮補編選爲郎廳鎮日入對頻賜顧問獎以淹博  
教筵臣曰曾觀其策對慮其多氣前後靳點將欲裁  
抑之也際遇自此始矣十月拜侍講院司書又移持  
平是時臺臣洪準海李亮天相繼投疏頗售黨習  
上并命安置絕島又以諸臺之不討黨人并投沿海

公謫務安癸酉宥還拜吏郎旋除宗簿寺正監修譜  
牒特陞通政秋拜寧越府使甲戌移拜原州值大歉  
捐俸賑飢丙子遞後御史自東還盛陳公治績特賜  
璽書表裏丁丑拜刑曹叅議三月薦爲義州府尹州  
是邊門重鎮公律已以嚴御衆以簡關市無滄邊民  
賴安有白馬山城爲西門保障公編成節目守城禦  
賊之策無不備載莅任三載政平事舉己卯湖西伯  
缺 上教曰灣尹治績予甚嘉焉盍試之大臣盛陳  
其文華才諳遂拜忠清監司時有言及中批者非專  
指公而猶以此引義納符闕外終不入謝黜補黃州

牧使陞辭之日引見慰諭曰行且召矣數月以兵曹  
叅議召還庚辰二月拜同副承旨序陞左副秋拜楊  
州牧使壬午復拜忠清監司時當大無悉心調救一  
路全活癸未持平金會元論一守令謂公誤置上考  
公上疏引嫌遂內移敦寧都正旋拜禮曹叅議甲申  
春以兩年善賑特命陞資拜副摠管兵曹叅判漢城  
右尹都承旨出爲羅州牧使又遭歉歲賑績最優特  
賜璽書及馬乙酉辭遞廟擬北兵使不下批丙戌特  
陞刑曹判書轉禮曹兼內局提調時兵判有闕而都  
政只隔四五日特命公代之使及期行政公延接武

士日數十百人盡記其名面收才峻濟沉屈羣情翕  
然丁亥拜戶曹判書綜理縝密細大無漏請托不行  
經用不匱以御帖奉安勞加正憲在任經年恭愷者  
傍伺戊子六月臺臣金容斥以倥侗公引義屢下  
嚴教終不起特補忠清水使當日辭朝書下 御筆  
曰暮年欲用予心悵然秋還拜刑曹判書兼守禦使  
大司諫李宜老上疏譏斥公力辭遞辛卯拜禮曹判  
書兼內局復拜戶曹以 文昭殿碑閣完役加崇政  
兼判義禁府事八月特拜右議政公上疏力辭答曰  
忠質之量乃國之心予知熟矣于今此舉專在于國

卽轉否回泰之機也才不借於異代卿須體君臣之  
大義卽起視事三疏 批益隆摯遂謝恩命是時有  
親臨鞫囚之舉因三司合啓諸大臣并命削黜未幾  
敘付判中樞十月復拜右相兼內醫軍器都提調時  
聖壽已躋八旬常在靜攝或因激惱至却湯劑有時  
動駕觸冒寒暑羣情莫不焦遑公左右扶護至誠導  
達嘗奏前席曰今日悠悠萬事莫過於保嗇 聖躬  
勿過勞動勿犯寒暑勿以羣下有罪移怒於湯劑  
聖心回悟多勉從焉又從容言曰臣纔遞度支知今  
經用每患不足伏願留心於節用 上傾聽焉或因

威譴過中竄配年久者因公言疏釋者甚多儒臣宋  
明欽疏論時事被罪迸出其後又有烏配其子之命  
公以法外陳白而蒙宥又念遐方文臣之沉滯請以  
蔭仕幾窠作文窠互相交差亦蒙施行自是年冬至  
明年三月相職或乍遞旋拜而眷遇不替四月又遞  
付西樞冬兼內局下教曰人生七十古來稀况來月  
入耆社特解內局之兼甲午入耆社六月又拜左相  
公年已及懸車素有聽瑩之病尋常酬酢多不能領  
會尤欲卸解重任累疏祈免而終未得請十月有雷  
異公上疏陳戒曰方今 寶籌彌高聖治益勵而仁

天示警修已事天有未至歟發政措事有所失歟財  
未節而侈風熾歟聽未廣而昌言伏歟小民有疾苦  
歟淫朋猶未歸極歟推而廣之有改無勉益昭 聖  
德仰答天心焉 優批以答乙未七月始解相職遞  
付西樞是年冬 上欲令今 上代理而凶徒譁張  
有沮戲之計大官煽動亦多和應之跡及徐公命善  
疏入 上燭其狀並罷鼎席復拜公左相公以國本  
孤危時勢岌業非臣子安坐之時不敢復言病即起  
視事隨機彌綸晝宵憧憧至忘寢食及聽政命下日  
自闕而退未解朝衣曰 宗社幾危而復安又退自

書筵甚有喜色曰今日朝講始覩國有 長君吾輩  
死無憂矣代聽初機務甚繁又兼藥院夙夜在公積  
瘁成疾而不敢言勞上書陳戒畧曰唯我 邸下誠  
孝出天令聞采彰肆 聖上八旬分勞之道遵 列  
朝已行之例邦禮既舉庭賀載行 列聖所以眷顧  
我 邸下一國所以蘄望我 邸下者亶自今日始  
矣經曰罔不在厥初不知 邸下將何以上副付托  
之 聖意下答顙望之羣情也古人言欲法堯舜當  
法祖宗我 大朝殿下祈天永命燕翼貽謨之要不  
越乎事天以敬奉先以孝破百年之朋黨而躋建極

之化均八路之民役而爲固本之道至於自省二篇  
卽精一心法之傳則 邸下體行之方顧不在是歟  
邸下以明睿之姿有緝熙之美而唯是莊重靜密作  
疑道之基敦本懋實爲進德之要幽獨之地操舍必  
謹舉措之際表裏交正此正天德王道之本至若勤  
講學則無尚文藻之華容讜直則克恢翕受之量存  
翫物喪志之戒以昭儉德杜左右僥倖之門以肅宮  
闈念茲在茲罔敢或懈則仰體無憂之 聖意益殫  
繼志之睿孝者亶在斯矣丙申正月李公澱重卜爲  
左相公從座次爲右相未幾當登對之際病卒劇自

前席扶出遣御醫看病二月十七日考終訃聞震悼  
賜柩材庀喪加厚仍給三年祿俸錄用奉祀孫 親  
製文遣近侍致祭時文臣殿講已定日矣今 上下  
令曰宋宰臣富弼之喪特撤曲宴殿講雖異於曲宴  
從厚之道不可强行卽令退定講期遣宮官致祭皆  
曠典也以四月禮葬于揚州石積面斂不用錦緞鞞  
不請輓詩輜車儀物務從儉約皆遺意也配贈貞敬  
夫人黃州邊氏宗簿寺正號望庵以中玄孫學生致  
殷女事舅姑以孝奉君子無違庚午歿繼配貞敬夫  
人清州韓氏領議政致亨之後學生景增女治家有



法宗黨稱其賢卒於戊戌兩夫人同祔於公男長元  
采繼伯父牧使公後蔭仕屢典州牧秩嘉善襲封韓  
恩君三女適主簿閔昞祥牧使鄭華淳士人朴參源  
皆元配出也韓夫人無育子從弟思淑之子憲采進  
士庶子端采冕采紳采女適鄭相裕元采二子海愚  
武科承旨海魯參奉女歸進士徐英修士人鄭有容  
林頤鎮朴宗殷憲采子海存女歸呂東奎韓重履閔  
昞祥子景淹景濂景游景淵景洪女歸李鳳來鄭華  
淳繼子東萬朴參源子宗復宗薰進士女歸鄭東萬  
李衡秀公姿性敏達儀度雅整平居無疾言遽色發

言持論根據精審當官莅事尺度甚嚴人不敢干以  
私釋褐後二十餘年潦到下位而恬然自安晚被知  
遇數歲之間超遷卿相而多出特簡世之睚眦者甚  
衆而公謙約畏慎與物無忤故足不履機弁身不受  
瑕摘而及登樞要超然於黨目之外唯以不避夷險  
隨處盡分爲報效之道至若乙未冬國勢凜綴復入  
鼎席殫誠坐鎮外若無事而勤勞實多古所謂屈節  
調護心勞身瘁有非平時大臣之比者正謂公所處  
也凡係國家機密之事筵席酬對之言一未嘗語人  
子姪輩亦不敢問今日有何事其謹嚴如此嘗以偏

耳溪集 卷三十六  
黨之禍終必凶國害家故雖平日燕居亦不掛齒牙  
間此乃平生規範而前後晉擢蓋出於俯燭其公心  
也故 親製祭文有曰事我幾年一段悃悞卿之丹  
心神祇可質唯此數句可想當時知遇之深也居家  
則孝友根天本生大夫人貞疾沉淹者數十年公晝  
夜扶護行不待履寢不設被家甚窶而甘旨必適其  
意嘗謂親病委之庸醫有古人所戒深究和扁之書  
茶藥必親製收效壽躋八耄而愈益康寧人謂誠孝  
之報與伯氏至老同居教子姪嚴而有恩親戚之窮  
者曲爲庇恤待以舉火者多內行之懿又如此公少

時在德山庄舍戊申亂起賊關來空官時吏校惶惑  
失措皆曰某村有某士盍往質焉遂奔走來告公曰  
亟囚傳關者馳報營門吏如其言公之素見重於鄉  
里亦可見矣其讀書也必以窮理爲先天人性命之  
說義理精微之蘊皆心會體認毫分縷析嘗斥來氏  
易之非爲說曰其於象數之學不可謂無所見而獨  
以錯綜二字爲易宗旨以蔽六十四卦之意則深竊  
疑之易理本自潔淨簡易截取繫辭中字句以塞後  
人之口吾不敢信也蓋近世文人全不致力於經史  
多購燕肆奇僻之書漸有沉淫不正之弊公用是懼

斥來易亦有微意也爲文辭本源經術操紙立成理  
勝辭達凡事情物理之難於名狀者形諸筆端曉然  
明白其儷語對策不甚經意隨手寫去而世多傳誦  
至於詩律雖不從事而嘗與吳公遂采曹公夏望酬  
唱於關東試院二公皆一代詞伯而自以爲不及也  
性好簡靜不喜陰陽方技出入徵逐公退之餘罕接  
賓客嘗曰科宦之人雖不能廢絕人事稍有閒時靜  
坐看書可以收斂身心若掇習古人緒餘謂之著述  
非切已之事博覽強記人稱淹該雖賢於博塞雜戲  
便是翫物公之平生所着力惟以六經濂洛諸書循

環尋繹涵養淳澹內蘊而不著見于外謙冲自持罕  
有論著故世之知之者鮮又病世之侈風日盛叅古  
禮酌時宜冠昏喪祭一從儉約著爲家式平居衣止  
布繇食不重味垣屋未嘗修治僮指不足使令過其  
門者不知爲卿相家也今 上諭祭文曰平生一節  
自勉清謹門庭冷落几席樸陋公退蕭然宛然寒素  
儘乎知臣莫如君也良浩從公後立朝三十餘年每  
於公餘叅訪討論經典觸處洞然矢口成誦雖專門  
宿儒殆不可及始知平日用功之深歷數摺紳罕有  
公比而最其宅心和厚褫身廉慎故受知 聖明夙

耳溪集 卷三十六  
夜匪躬恩眷終始不替蓋有以也今公胤子韓恩君  
賈家狀來屬易名之辭謹撮其言行大畧立朝本末  
以告太常氏

耳溪集卷三十六

終



